

皇朝詩林



康節先生皇極經世書東史補編通載卷之七

東陽申翊聖編

經世之卯二千二百七十二

甲午宋徽宗十四年○高麗文孝王九年

秋八月新作延福宮成

○供奉官安稷崇至自宋帝賜王新樂
及譜訣

乙未春正月女真完顏阿骨打稱帝國號金二
月立定王桓為皇太子秋九月金取遼黃

龍府



甲傲字 政和四年甲午
遼乾統 五年

高唐 肅宗九年

肅宗 位號明高

○秋遼將伐女真請兵○冬設八關會
王自毬庭還至閣門前駐蹕唱和命倡
優歌舞仗內幾至三鼓御史崔贄雜端
許載進諫王嘉納之

丙申春正月賜方士林靈素彌通真達靈先生
二月上清寶籙宮成夏四月詔祭京三日
一朝總治三省事

○叅知政事致仕高令臣卒令臣少孤
力學善屬文歷仕中外議論慷慨其在
政府公卿爭進雜法令臣以為祖宗成

憲具在何必更作以清儉自守及卒家
無羨財○校書郎鄭良稷自遼東京還
時東京勃海人作亂殺留守蕭保先立
供奉官高永昌僭稱皇帝國號大元建
元隆基良稷上表稱臣以國家所遺留
守土物贈永昌得厚報及還匿不告事
覺下獄治之○左遷和制誥崔瀾為春
川府使王幸西京泛舟大同江扈駕諸
臣及西京留守等侍宴王與侍臣唱和
流連淪上書曰昔唐文宗欲置詩學士

宰相奏曰詩人多輕薄恐撓聖聰文宗
廼止帝王當好經術日與儒雅討論經
史咨諏政理安事雕蟲數與輕薄詞臣
吟風嘯月以喪天衷耶王優納之有一
詞臣乘隙曰淪所謂儒雅除臣等別有
何人淪短於詩故有此言王怒黜之是
後日與郭輿及詞臣遊宴哦詩唱和○
金主阿骨打遣阿只來○中書門下奏
遼為女真所侵有危亡之勢所稟正朔
不可行自今公私文字宜除去年號但

用甲子從之○王字之文公義使宋還
帝賜大晟樂遣李資諒等謝仍下制大
晟樂文武舞宜先薦宗廟以及宴享○
作清讌閣于禁中選置學士朝夕講論
經籍俄以清讌閣在禁中學士直宿出
入為難又置寶文閣于紅樓下南廊移
清讌閣學士充之加置待制充其選者
皆一時豪彥○宴清讌閣謂學士等曰
朕嘗覽政要太宗曰但使天下太平家
給人足雖無祥瑞可比德於堯舜若曰

姓不足夷狄內侵縱有芝草鳳凰何異
於桀紂斯言至矣庶幾景行遂命金縷
朴景仁及寶文閣學士註解政要以進
又命學士等曰投壺古禮也廢已久宋
帝所賜其器極精卿等可纂定投壺儀
并圖以進○十二月大饑○契丹前後
五十餘人漢兒五十餘人奚家二百四
十餘人熟女真二十三人渤海九十六
人來投

丁酉金改元天寶春二月帝幸上清寶籙宮命

林靈素講道經夏四月道錄院上章冊帝
為教主道君皇帝冬十一月命蔡京五日
一赴都堂治事十二月帝宮天神降于坤
靈殿以童貫領樞密院事

○金緣在此邊馳奏金兵攻遼統軍耶
律寧與常孝順等移牒以來遠挹州二
城歸于我遂率其衆載船百四十艘泛
海而遁我兵入其城收兵仗錢穀甚多
王大悅改挹州為義州以鴨江為界置
關防百官表賀○金主遣阿只等五人

移書書至大臣極言和親不可御史金
富轍上疏許和便遂不報○李資諒使
宋至汴京帝親賜宴製詩示之命資諒
即製進帝大加稱賞將還密諭曰聞汝
國與女真接壤後歲來朝可招諭數人
來資諒奏曰女真人面黧心夷狄中景
貪醜不可通上國有幸臣奏曰女真珍
奇雜出高麗素與互市不欲分利他國
故沮之不必借高麗可遣一介招致竟
交通致靖康之禍進士權適趙爽金瑞

偕資諒還

戊戌改元靈和春三月遣武義大夫馬政浮海使金約夾攻遼

○重修安和寺窮極奢侈勞費不貲王親設齋五月落成求書扁額于宋皇帝聞之御書佛殿扁曰能仁之殿命蔡京門額以賜之○以金尚礪判閣門事李惟仁為大府卿二人清直自守所至皆有聲績而未嘗干謁權貴年高未達韓安仁上劄請加擢用以勵具臣故有是

命

己亥改元宣和秋九月幸蔡京第加蔡攸開府儀同三司冬十一月召楊時為秘書郎

○金主遣使來聘致書遣中書主事曹舜舉聘于金國書有况彼源發于吾土之語金主拒不受○始於國學立養賢庫王銳意儒術置儒學六十人武學十七人選名儒為學官以教導之文風稍振

庚子春正月林靈素有罪放歸田里二月遣趙

良嗣使金夏五月金攻遼上京留守耶律
撻不野以城降六月詔蔡京致仕秋八月
金人來議攻遼及歲幣遣馬政報之冬十
月睦州人方臘作亂

○王命黜赴制科國學生高孝冲下獄
王時頗好樂妓玲瓏遏雲等以善歌屢
承恩賚孝冲作感二女詩以諷之中書
舍人鄭克永言於王王不悅孝冲赴舉
命黜之下獄胡宗朝上書營救乃釋之
○迎入佛骨于禁中○王幸安和寺順

德王后真堂薦酌流涕后李氏資謙之
女也初為延德宮主聰惠有寵及薨王
屢舉哭臨其葬也親祀于神鳳門外冊
幸魂堂言官諫不聽是後亦屢幸又微
幸陵寢○秋遼遣副使蕭遵禮詔以戎
孽路阻同仇大順之意

辛丑春二月淮南盜宋江掠京東諸郡知海州
張叔夜擊降之秋七月黑管見於禁中九
月詔宦者李彥括民田于京東西路

○幸安和寺還次李資謙山齋置酒賜

資謙推誠佐理功臣邵城郡開國伯○
叅知政事致仕朴景仁卒景仁少力學
登科三為諫官言論勁直無所依違

壬寅春正月金克遼中京三月金克遼西京五

月童貫進兵擊遼敗績退保雄州詔班師

秋七月詔童貫蔡攸再舉伐遼九月除朝

散郎宋昭名遼將郭藥師以澠易二州來

降冬十一月金人來議燕地十二月遣趙

良嗣復如金求營平灤三州金克遼燕京

○門下侍郎致仕崔弘嗣卒起自寒微

性貞介寡欲朝無黨與居家不言公事
妻子未嘗見其喜笑人有饋遺雖蔬果
不受然務苛察見人小過輒不忘○王
御紗樓召文臣五十六人刻燭命賦壯
丹詩主簿安寶麟為第一賜綰有差時
康日用以能詩名王好觀其作燭將盡
纔得一聯云頭白醉翁看殿後眼明儒
老倚欄邊袖其藁伏御溝中王命小宦
取視嗟賞不已古人所謂白頭花鈿滿
面不如西施半粧○王幸順天館宴宰

樞忽覺背有微腫促駕還宮仍疾革召
太子面諭曰予追思所行得失多慎
勿效焉但當稽古聖賢之道奉我太祖
之訓不懈于位永綏庶民命韓汝仁取
國璽以授薨太子勿諸弟頗有凱覲心
李資謙奉太子楷即位是為仁宗恭孝
王○夏五月加李資謙功臣號守太師
中書令邵城侯詔曰中書令李資謙太
后之父於朕為外祖班次禮數會議聞
奏○平章事韓安仁奏睿宗在位十七

年事業宜在史冊請依宋朝故事置實錄編修官以學士朴昇中鄭克永金富軾充編修官使修實錄○十二月李資謙殺中書侍郎韓安仁流文公羨鄭克永李永等安仁湍川人睿宗朝與李永等以潛邸舊恩密近用事兄弟親戚分據要路與文公羨李資謙及崔弘宰俱在樞府外和而內忌安仁奏資謙為上公不令視事陽尊而陰奪之權會有崔惟迪賂資謙減獲二十口得除給事中

物議譁然安仁颺言於省中資謙聞之
大怒請辨於御史臺安仁慙恐告休數
與公羨克永李永等會散侵夜又崔思
全者以大醫視睿宗背疽不早治被論
於安仁輩挾宿憾伺間群怨交搆譖以
安仁公羨結黨陰謀將不利於上公資
謙遂羅織其罪流安仁沉殺之公羨克
永李永等及親婭緣坐流竄者亦多李
永安城郡吏之子勤學登第歷臺閣至
是以安仁妹婿流琮島聞其母將沒為

婢曰吾內省不疚故忍死以待老母以
予故沒為賤隸吾何苟生乃飲酒一斗
憤懣死資謙遣術士瘞道傍牛馬不敢
踐或病瘡者就禱則愈資謙敗永子請
改葬掘之屍不變贈簽書樞密院事永
天資方直不為權貴所撓然取友不端
拓俊京智祿延等謀害士類永皆與焉
癸卯春正月金遣使來趙良嗣復如金王安中
知燕山府郭藥師同知府事三月遣使如
金夏五月以楊時為通政殿說書六月金

張毅以平州來歸秋七月童貫致仕以內
侍譚稹為兩河燕山路宣撫使

○以金緣判秘書省事監修國史緣見
王幼冲外戚用事懇辭乞退以崔弘宰
為門下侍郎平章事拓俊京為吏部尚
書叅知政事○宋遣禮部侍郎路允迪
致奠吊慰

甲辰春三月金人來索糧不與秋八月譚稹罷
復以童貫領樞密院兩河燕山路宣撫使
冬十一月王黼有罪免

○李資謙流崔弘宰于禱地島○遣樞
密使朴昇中詔諭李資謙釋衰赴朝賜
衣帶金幣冊資謙為亮節翼命功臣領
門下尚書都省事判吏兵部西京留守
事朝鮮國公王出殿門親傳詔書百官
進賀資謙第資謙釋衰赴中書百官又
綴行庭賀是日大雷電以雨○資謙納
第三女子王資謙恐他姓為妃則權寵
有所分強請之王不得已從之是日大
風雨拔木

乙巳春正月遼主延禧如党項二月至應州金
將婁室獲之以歸遼耶律大石稱帝于起
兒後夏六月封宦者童貫廣陽郡王前寶
文閣待制劉安世卒秋九月有狐昇御榻
而坐冬十月金將粘沒喝幹离不分道入
寇十二月童貫自太原逃歸粘沒喝幹离
不陷朔代州遂圍太原金幹离不入檀薊
州鄴藥師以燕山叛降金金盡陷燕山州
縣詔內侍梁方平率衛士守黎陽以皇太
子為開封牧以吳敏為門下侍郎帝傳位

于太子太子即位是為欽宗尊帝為教主
道君太上皇帝以李綱為兵部侍郎立皇
后朱氏大學生陳東上書請誅蔡京等六
人

○資譙又納第四女子王是日又大風
雨○五月遣陳叔如金金以國書非表
又不稱臣不納

丙午改元靖康春正月梁方平之師潰於黎陽
金人遂渡河虜王補于永州賜李彥死并
籍其家放朱勳歸田里補至雍丘盜殺之

太上皇出奔亳州遂如鎮江以李綱為尚
書右丞東京留守兼親征行營使京師戒
嚴遣使督諸道兵入援金幹高不圖京師
李綱力戰禦之金人來議和詔出內帑及
括借士民金帛與之遣康王構及小宰張
邦昌往為質种師道帥師入援以師道為
同知樞密院事統四方勤王兵二月都統
制姚平仲將兵夜襲金營不克而遁罷李
綱以謝金人太學生陳東上書請復用李
綱詔以綱為尚書右丞京城防禦使除元

祐黨籍學術之禁更以甫王樞為質于金
康王構還詔割三鎮以畀金金幹高不引
兵北去京師解嚴李邦彥免种師道罷金
粘沒喝入威勝軍陷隆德府貶蔡京為秘
書監童貫為右衛上將軍蔡攸太中大夫
梁方平伏誅金粘沒喝還雲中留軍圍大
原三月張邦昌李梳免詔种師道屯滑州
姚古种師中援三鎮古復隆德府威勝軍
師中追幹高不至北鄙而還詔李納迎上
皇于南京夏四月上皇至京師立于湛為

皇太子召河南尹焞至京師彌和靖慶士
遣還五月罷王安石配享孔子猶從祀廟
庭國子祭酒楊時致仕詔种師中姚古進
軍大原師中與金人戰于殺熊嶺敗績死
之右軍潰六月詔种師道還以李綱為兩
河宣撫使秋七月竄蔡京于儋州道死童
貫趙良嗣伏誅李綱至懷州諸軍潰于大
原八月金粘沒喝幹萬不復分道入寇九
月金粘沒喝陷太原蔡攸朱勔伏誅罷李
綱知揚州謫中書舍人劉珣胡安國于遠

州李回為大河守禦使折彥質為河北宣撫副使罷西南勤王兵冬十月罷御史中丞呂好問十一月金粘沒喝陷河東諸州郡李回折彥質師潰金人遂渡河陷西京詔馬滸使金軍請和詔王雲副康王構使金軍許割三鎮至磁州州人殺雲構還次相州以郭京為成忠郎選六甲兵以禦金遣耿南仲聶昌使金軍許盡割兩河地昌為絳人所殺南仲奔相州金幹高不粘沒喝圍京城要帝出盟南道都統管張叔夜

將兵勤王詔康王構為天下兵馬大元帥
郭京出禦金軍敗走京城陷帝如金營請
降十二月康王構帥師入衛次于東平帝
如金營遣使如兩河割地以昇金

○春二月內侍祗候金粲錄事安甫麟
同知樞密智孫延謀殺李資謙拓俊京
不克資謙俊京舉兵犯闕火宮禁宮闕
燒盡殺甫麟祿延左僕射洪灌知樞密
金鎮及侍衛臣僚流金粲逼王于重興
宅西院王恐被害請禪位于資謙資謙

不敢發言平章事李公壽颺言于坐中
曰上雖有過李公豈敢如是資謙意遂
沮上自居西院左右皆資謙之黨國事
不自聽斷動止皆不自由資謙俊京威
勢益煽無敢誰何○召百官議事金可
否皆言不可獨資謙俊京曰金既暴興
滅遼與宋與我接境不得不事從之○
黃霧四塞○日色如血○夏五月李資
謙反王命崔思全拓俊京討之流資謙
及妻子支黨朴昇中朴彪等資謙圖不

軌進毒餅中妃密白王以餅投烏烏斃
又送毒藥妃捧碗陽跪而覆之王曾與
思全謀諭俊京以禍福乃決策俊京在
兵部注擬武職王手書小紙密送俊京
俊京乃示尚書金珣珣泣曰有旨如此
義當死俊京與珣率將校僚吏僕隸入
宮奉王出御軍器監召資謙并妻子拘
囚於八關竇斬其將康好高珮守捕支
黨子姪并流之○以拓俊京為檢校太
師守保門下侍郎平章事李公壽判文

部金珣吏部尚書皆賜功臣彌崔思全
兵部尚書○王廢二妃李氏納任氏為
妃○秋七月宋遣閣門祇候侯章歸中
孚等詔諭新承內禪金兵陷逼之故勉
率士衆表裡王師以報中國數歲之恩
侯章又致書於王大略言姦人啓議開
邊使金人猖獗擾我中原告和求歸復
有無厭窺伺河此待以秋涼興師討伐
乘此之時本國安可坐視願務兵境上
共為掃除王答書侯章還王附表以聞

○九月遣金富弼如宋賀登極富弼三
明州會金兵入汴道梗不得入至明年
五月乃還○金遣使來諭凡遣使往來
當循遼舊王餞金使于大明宮遣使報
謝一依事遼○十二月李資謙死于靈
光郡○以金仁存為翊聖同德功臣太
師門下侍中監修國史上柱國判吏部
事

丁未春正月命太子監國復如金軍河東割地
使劉韜自經于金營副元帥宗澤大敗金

人于衛州二月金劫上皇及后妃太子宗
戚至其軍吏部侍郎李若水死之康王構
次于濟州金人議立異姓執孫傳張叔夜
及御史中丞秦檜夏四月金人以二帝及
后妃太子宗戚三十人北去張邦昌稱哲
宗廢后孟氏曰宋太后五月康王即皇帝
位于南京改元建炎是謂南宋高宗遙上
靖康帝尊號曰孝慈淵聖皇帝黃潛善為
中書侍郎汪伯彥同知樞密院事尊哲宗
廢后孟氏為元祐太后以張邦昌為太保

封同安郡王五日一赴朝堂參決大事召
李綱為尚書右僕射兼中書侍郎以呂好
問為尚書右丞竄才子郭彥吳敏李勉耿南
仲等子遠州追貶蔡確蔡卞邢恕等官以
宗澤知襄陽府安置監察御史張素于江
州六月李綱至行在固辭相位不許安置
張邦昌于潭州貶放其黨有差贈李若水
曹安國劉韜官詔諸路訪死節之臣以聞
以李綱兼御營使遣宣義郎傅雱使金軍
道問二帝以宗澤為東京留守詔諸路募

兵買馬勸民出財以張所為河北招討使
秋七月以范致虛知鄧州元祐太后如揚
州閤門宣制舍人曹勛以上皇手書至自
金八月以李綱黃潛善為尚書左右僕射
兼門下侍郎召河東經制副使傅亮還行
在罷李綱提學洞霄宮殺大學生陳東布
衣歐陽徹安置河北招討使張所于嶺南
張邦昌伏誅金盡陷河北州郡冬十月帝
如揚州遣朝奉郎王淪使金十二月金人
分道入寇遂陷西京

○幸西京妖僧妙清曰者白壽翰說王
設灌頂道場其術詭誕不可知○王與
妃及兩公主幸興福寺遂共御龍舟宴
樂于大同江召宰樞侍臣侍宴○拓俊
京恃功跋扈王忌之左正言鄭知常上
疏略曰五月之事一時之功也二月之
事萬世之罪也於是疏俊京于品隋屬
○文公羨韓安仲文公裕鄭克永等召
還復職○金遣使來詔諭趙主父子見
俘并宗族四百七十餘人差押赴闕及

冊命亡宋大宰張邦昌為大楚皇帝等事

○十二月門下侍郎金仁存卒

戊申春正月金將兀朮犯東京宗澤敗之以劉

豫知濟南府夏四月工部侍郎兼侍講楊

時罷秋七月東京留守宗澤卒以杜充代

之冬十二月劉豫叛降金以黃潛善汪伯

彥為尚書左右僕射兼門下中書侍郎

○宋帝遣刑部尚書楊應誠齊州防禦

使韓侂來宣詔應誠等又劄陳假道迎

請二帝津發使人一行至界上先報知
金人以聽可否王答以書應誠等還附
表謝遂不受例贈禮物亦不受而去○
遣禮部侍郎尹彥頤如宋以答揚應誠
書中之意修表上之彥頤還回詔曰願
孝友之思雖欲伸於己忘然幾微之際
亦當盡於人情既諒恭勤毋忘屏衛○
幸西京妙清白壽翰以不經之說眩惑
衆人鄭知常亦西京人深信之金安洪
彛叙李中孚大臣文公仁林景清從而

和之於是妙清等上言西京林原驛地
是陰陽家所謂大花勢巖立宮闕御之
則可并天下金國執贄自降三十六國
皆為臣妾遂移林原驛作新宮

己酉春二月詔劉光世將兵阻河以拒金光世
兵潰走還金粘沒喝遂陷天長軍帝奔鎮
江帝如杭州以呂頤浩簽書樞密院事守
鎮江黃潛善汪伯彥以罪免三月以朱勝
非為尚書右僕射兼中書侍郎命張俊駐
平江王淵同簽書樞密院事扈從統制苗

傅劉正彥作亂殺王淵及內侍康履等劫
帝傳位于魏國公粵請隆祐太后臨朝張
浚呂頤浩會兵討賊金以劉豫知同平府
節度河南州郡夏四月帝復位呂頤浩張
浚敗賊將苗翊于臨平苗傅劉正彥夜遁
頤浩入杭州帝如江寧冊魏國公粵為皇
太子五月以張浚為川陝京湖宣撫處置
使便宜黜陟遣徽猷閣待制洪皓使金金
人拘之韓世忠獲苗傅劉正彥送行在誅
之六月大霖雨詔郎官以上言闕政黜王

安石配享神宗廟庭金元朮大舉入寇秋
七月廣州教授林勳上本政書八月以呂
頤浩杜充為尚書左右僕射並同平章事
罷起居郎胡寅詔杜充韓世忠劉光世分
屯江東以備金帝如臨安九月金人陷南
京冬十月帝至臨安留七日復如越州張
浚治兵于興元以圖中原十一月知徐州
趙立將兵勤王敗金人于淮陰以趙鼎為
御史中丞金元朮渡江入建康杜充叛降
金帝奔明州十二月金元朮陷臨安遣兵

渡浙追帝帝航于海江淮統制岳飛敗金人于廣德

○西京新宮成幸西京御新宮○忠州人劉挺弑其父中書門下奏請降州為郡王問左右對曰禮云邾婁定公時有殺其父者殺其人毀其室誇其宮而止耳降州為郡非古法也

庚戌春正月金人陷明州遂罷帝于海帝走溫州二月金兀朮引兵北還金人陷東京帝還越州夏四月韓世忠邀擊金兀朮于江

中大敗之走建康復引兵醜世忠敗績兀
术趨江北六月張浚罷其都統制曲端秋
七月金兀术引兵趨陝西金徙二帝于五
國城九月金立劉豫為齊帝張浚使都統
制劉錫帥五路之兵與金婁室大戰于富
平敗績浚退軍于秦州冬十月金縱秦檜
還十一月張浚軍興州遣吳玠守和尚原
以拒金

○御史奏國學養士太多供給甚費

請簡留科修業成者略予人餘悉出之

於是國學諸生詣闕上書論御史臺王
從諸生言○左遷侍御史高唐愈為工
部員外郎初唐愈坐論資謙之黨貶秩
復為臺官又論資謙之亂朝臣贗從失
節而黃緣苟免者多至宰輔雖聖上寬
大掩其疾疵何面目立朝廷見日月乎
王雖是其言不忍盡棄大臣尋擢唐愈
為禮部郎中實奪臺職也○禁諸生治

莊老學

辛亥改元紹興秋八月張浚殺殿前威武大將

軍曲端以秦檜為尚書右僕射同平章事
兼知樞密院事以呂頤浩為尚書左僕射
同平章事兼知樞密院事冬十一月金兀
朮寇和高原吳玠及其弟璘大敗之兀朮
遁十二月金以陝西地畀劉豫

壬子春正月帝如臨安二月李綱為湖廣宣撫
使夏四月詔呂頤浩都統江淮荆浙諸軍
使開府鎮江劉豫徙居汴五月育太祖後
子偁之子伯琮于宮中賜名瑗六月頒戒
石于州郡秋八月召朱勝非兼侍讀罷給

事胡安國及程瑤等二十人秦檜免榜其
罪于朝堂九月王倫還自金以王似為川
陝處置副使十二月罷湖廣宣撫使李綱
召張浚知樞密院事熙河蘭廓經略使關
師古舉兵復熙鞏

○二月遣員外郎崔惟清等如宋上表
曰屬兩聖之遠征不能奔問官守及大
人之繼照又未得稱慶闕庭終曰上尊
周室媿莫追晉伯之前功內屬漢庭冀
不失朝鮮之舊事惟清還回詔略曰朕

省南國通道東藩載嘉享上之恭重有
觀光之請爰即乘輿之所幸以須信使
之來庭顧秋塞馬肥或戒嚴之不暇而
春潮舟穩庶利涉以無憂○八月大雨
漂沒人家不可勝數又水勇奉恩寺後
山上古井奔流入古學廳漂沒經史百
家文書○平章事崔滋盛知貢舉吏部
侍郎林存同知貢舉出賦題云聖人耐
以天下為一家省官奏按耐古能字今
以耐為韻請命改試不允因命滋盛更

試又命題云天道不閉而能久省臺又
奏按禮記云天道不閉而能久鄉本家
語以不閉為不閉者蓋謬誤耳今貢院
不考正經而據錯本請罷滋盛等停今
年選舉王命只取經義可取者二十五
人御史任元濬等請追奪名牌改試不
報元濬等退而待罪臺空凡七日又國
學生井彥伯等五十人上書請試不報
癸丑春三月金人陷金州王彥超走石泉三月
劉子羽吳玠兵潰于饒風關金人入興元

子羽玠還擊破之夏四月以韓肖胄簽書
樞密院事遣使金六月岳飛討江廣群盜
軍盡平之秋九月呂頤浩罷冬十二月韓
肖胄偕金使來

甲寅春三月吳玠吳玠與金兀朮戰于仙人關
大敗夏五月以岳飛兼荆南制置使秋八
月以趙鼎知樞密院事都督川陝荆襄諸
軍事九月劉豫使其子麟以金兵入寇趙
鼎為尚書右僕射同平章事兼知樞密院
事冬十月詔韓世忠進屯揚州召張浚于

福州帝自將禦金于樂丘十一月詔暴劉
豫罪逆于六師以張浚知樞密院事視師
江淮十二月金兵自淮引還

○春幸西京移御大花闕駕初發暴風
揚塵馬不能前流星墮地大如斗○國
子司業林完上疏請誅妙清先是同知
樞密使任元凱上書請誅妙清白壽翰
等皆不報○六月震西京大花闕乾龍
殿

乙卯春二月帝如臨安趙鼎張浚為尚書左右

僕射並同平章事兼知樞密院事都督諸路軍馬夏四月上皇卒于金龍圖閣直學士致仕楊時卒五月遣忠訓郎何蘓使金六月岳飛大敗楊么于洞庭么死湖湘平冬十一月以李綱為江西安撫制置大使金伐蒙古

○正月妙清柳昂與分司侍郎趙匡司宰少卿趙昌言安仲榮等以西京叛命平章事金富軾等討之

丙辰春二月張浚會諸將于鎮江遣張浚屯盱

昭韓世忠屯楚州夏四月起復岳飛為京
湖宣撫副使六月張浚撫師淮上遣劉光
世屯廬州岳飛屯襄陽楊沂中屯泗州秋
七月陳公輔為左司諫八月以秦檜為行
營留守孟庾之副之並叅決尚書省樞密
院事九月帝如平江岳飛遣兵敗劉豫之
衆于蔡州上䟽請進軍恢復中原帝不許
飛乃還鄂十一月劉豫使劉麟劉猷分道
寇淮西楊沂中等大敗猷于藕塘追麟至
南壽春而還十二月張浚還自鎮江趙鼎

罷陳公輔乞禁程氏學詔從之

○詔曰昔鄭莊公置姜氏于顛城誓曰
不及黃泉無相見也既而悔之復為毋
子如初今外舅李氏雖沒而親親之意
終不可忘可贈檢校太師漢陽公妃崔
氏封卞國大夫人

丁巳春正月何蘓還自金始聞上皇及太后之
喪帝成服二月遣王倫如金三月帝如建
康夏四月岳飛乞終喪遂還廬山張浚以
張宗元監其軍秋八月召淮西副統制鄺

瓊赴行在以衆叛降劉豫呂祉死之九月
張浚免罷都督府以趙鼎為尚書左僕射
同平章事兼樞密使冬十月安置張浚于
永州閏月以尹焞為崇政殿說書金人罷
汴執劉豫廢為蜀王立行臺尚書省于汴
韓世忠岳飛請伐金收復中原不報十二
月王倫還自金尋復遣之

戊午春二月胡安國進春秋傳詔加安國寶文
閣直學士帝定都臨安三月以秦檜為尚
書右僕射同平章事兼樞密使夏五月王

倫偕金使來秋七月王倫復如金冬十月
罷叅知政事劉大中趙鼎罷勾龍如淵為
御史中丞金以張通古為江南詔諭使來
言歸江南陝西之地十一月以孫近叅知
政事罷知學士院曾開詔群臣議和金得
失敗樞密院編修官胡銓監廣州都監倉
已未春正月大赦以王倫為東京留守三月王
倫至自汴金人歸河南陝西之地夏四月
罷權吏部尚書晏朝復秋七月王倫如金
金人執之

庚申春正月觀文殿大學士隴西公李綱卒夏
五月金兀朮撤离曷分道入寇復陷河南
陝西州郡六月東京副留守劉錡大敗金
人于順昌兀朮走汴岳飛遣兵敗金人于
京西岳飛收復河南州郡秋七月岳飛擊
走金兀朮于郾城追至朱仙鎮大敗之岳
飛奉詔班師還鄂河南州郡復陷于金八
月貶秘閣修撰張九成等官九月遣使諭
韓世忠還鎮冬十月金始置屯田軍于忠
原

○門下侍中致仕金若溫卒若溫初名
義文侍中良鑑之子性恭儉廉靜歷仕
中外所至人便之李資謙秉權喜利者
爭附若溫與資謙堂兄弟而不相比世
多其守正○宰臣金富軾任元凱等與
省郎崔梓鄭韶明等上書言時弊十條
伏閣三日皆不報梓等乞罷不出王罷
執奏官減諸處內侍別監及內侍院別
庫乃召梓等令視事獨韶明以所言不
盡從不起

辛酉春正月金兀朮陷壽春入廬州詔張浚等
將兵救之三月張浚揚沂中劉錡奉詔班
師金兀朮渡淮北去夏四月以韓世忠張
浚為樞密使岳飛為副使秋七月罷淮北
宣撫判官劉錡八月罷知溫州王居正罷
岳飛奉朝請九月吳玠等收復陝西諸州
詔班師還鎮冬十月秦檜矯詔下岳飛于
大理獄韓世忠罷十一月和議成以何鑄
簽書樞密院事奉表稱臣于金遣使割唐
鄧商秦之地以畀金秦檜殺故小保樞密

副使武昌侯岳飛

○遣禮部侍郎權迪等如金以農時不
納秋再遣○金遣使冊王故事受冊命
必於南郊今使臣宗禮等奉朝廷指揮
始於王宮頒詔

壬戌春二月何鑄還自金夏四月金使人以衣

冕來冊帝秋八月金人送徽宗皇帝顯肅

皇后鄭氏及懿節皇后邢氏之喪皇太后

韋氏至自金冬十一月張浚免詔秘書小

監秦熺修日曆

癸亥夏閏四月立貴妃吳氏為皇后秋七月行
人洪皓張邵朱弁還自金

經世之辰二千二百七十三

甲子宋高宗十七年○高麗恭孝王二十二年

夏四月初禁野史秋九月徙趙鼎于吉陽

軍

○制曰拓俊京雖失為臣之節亦有衛

社之功可授檢校戶部尚書疽發背死

于谷州

乙丑夏六月帝幸秦檜第秋放張浚于連州冬

十二月立春夜天有聲如雷太史占曰立春
春日天鳴至尊憂且驚

丙寅秋九月金劉豫死

○春正月王宴金使于大觀殿遂不豫
疾篤遣內侍徙置資謙妻子于仁州又
追復拓京俊門下侍郎平章事召還其
子孫官之次金堤郡新築碧骨堤堰皆
從巫言也○二月王疾大漸傳位于太
子昉遂薨是謂毅宗莊孝王

丁卯秋八月故相趙鼎卒于吉陽軍

○夏四月幸外帝釋院自是游幸寺院不可勝記○臺諫上章言事不報歸第王乃下毬技于御史臺臺奉詔鎮壽昌宮北門以禁羣小出入王游北園謂左右曰吾擊毬之技不復試矣已而取毬擊之人莫有及者○取升補試任裕公等五十五人○御西樓觀擊毬自此無日不觀○御史臺奏壽昌宮北門嘗奉詔關鎖散負李直拔校尉鄭仲夫等擅開出入請下吏王不聽○禁同姓親族

相婚

戊辰

○金遣使命王洛起復冊王○李深智
之用與宋人張喆同謀深變名稱東方
昕通書宋太師秦檜若以伐金為名假
道高麗我為內應高麗可圖也之用以
其書及高麗地圖附宋商彭寅以獻檜
至是宋都網林大有得書及圖來告囚
喆深之用鞠之皆服深之用死獄中喆
伏誅○以任元凱守太尉定安公金富
軾守太保尹彥頤政堂文學高兆基中

書侍郎平章事

己巳

庚午春正月殿司軍士施全刺秦檜不克檜殺之

辛未以余堯弼叅知政事遣余堯弼使金

○門下侍中致仕金富軾卒○三月日

有黑子大如雞卵後十日又如如是者再

○王將宴侍臣諫議王軾見宦者鄭誠

崇班帶犀指臺負白此而不憚臺官可

謂無目者矣御史雜端李綽昇憤然作

色令臺吏李份取其帶誠白王王大怒
命內侍李成允執份王不悅罷宴即解
所御帶賜誠以誠權知閣門祇候御史
臺以宦者參朝官無古制爭之不聽臺
官復不出王收誠祇候制誠怨之嗾鄭
壽開誣告臺官等怨大家謀推大寧侯
暉為主按問無驗黥流壽開○金存中
與郎中鄭叙有隙嗾諫議王軾等論叙
交結大寧侯之罪存中鄭誠乃搆飛語
以聞王亦疑之繼而宰相崔惟清等率

諫官彈奏鄭叙邀致大寧宴樂遊戲又
論鄭誠謀陷臺官罪皆罔赦王并宥之
知臺事崔允議直入王所爭之流叙于
東萊貶崔惟清南京留守李綽昇南海
縣令皆叙妹婿也於是存中益寵幸

壬申

○宴萬壽亭至曉乃罷先是內侍尹彥
文聚恠石筭假山于壽昌宮北門構小
亭彌萬壽被壁以黃綾窮極侈奢宴將
罷假山頽牝鷄鳴○秋七月右諫議大
夫申淑等伏閣切諫凡三日乃黜內侍

十四人茶房五人

癸酉春三月金入都于燕

甲戌秋七月以敷文閣侍制秦埴修撰實錄院

○更定科舉法○召平章事崔子英門

下省事梁元俊起居舍人崔婁伯訪問

國政

乙亥冬十月進封秦檜建康郡王加其子熺小

師并令致仕是夕檜死

丙子夏六月靖康帝卒于金秋八月以張綱叅

知政事

○定安公任元厚卒元厚器宇宏深風彩嚴重博通經史勤儉清白妙清奸說一時傾信而元厚獨擯之人服其明及判吏部銓注甚公人稱山濤王即位以太后父令上殿行禮諫官論之遂封公願養

丁丑 ○春正月戊辰朔風從乾來太史奏曰國有憂王懼卜者榮儀因進禳禱之說王信之命於靈通敬天等五寺終歲作佛事又遍祀遠近神祠使者絡繹且於

諸寺皆張法會至限千日萬日財竭民怨○幸國清寺遂幸敬天寺有司奏行在所狹隘請去史官王曰史官記予言動不可暫離○中書侍郎平章事致仕高兆基卒兆基耽羅人性慷慨涉獵經史尤工五言詩為諫官直言不諱拜平章事屈節附金存中時議非之○遷太后任氏于普濟寺流弟大寧侯驛于天安府貶崔惟清為忠州牧使王素信圖讖不友諸弟密諭諫臣論劾大寧侯又

恐太后救之先遷之○作離宮于闕東
宮曰壽德殿曰天寧又以侍中王冲等
四人第宅為別宮又毀民家五十餘區
作太平亭亭南鑿池作觀瀾亭其北構
養貽亭蓋以青瓷南構養和亭蓋以椽
又磨玉石筭二臺聚恠石作仙山遠引
水為飛泉窮極侈麗群小逢迎民間珍
異之物無問遠近運載絡繹○王聞東
海中有羽陵島地廣土肥舊有州縣可
以居民遣溟州都道監倉金柔立往視

○復以鄭誠為閣門祇候王召承宣李元膺右諫議李公升等督署鄭誠告身宰臣諫官不得已署之獨李智深等數人不署皆左遷誠自是獲參朝列權寵日盛親黨布列交構讒訴陵轍朝臣侵漁間巷宦寺亂法莫盛於斯繼而申淑金錫柳公材等上疏極諫

戊寅冬十月金營汴宮

○太史監侯劉元度奏白州兔山半月崗實我國中興之地若營宮闕七年之

內可吞北虜遣平章事崔允儀相之還
奏曰山調水順可營宮闕王遣允儀及
李元膺等徵發西海道丁夫催督告成
賜闕名重興殿額太和術士私語曰此
道詭所謂庚方客虎舉頭掩來之勢創
闕於此恐有危亡之患冬王幸白州御
新闕受賀是日天地昏黑大風拔木王
頗疑之○門下侍郎平章事梁元俊卒
元俊出自胥吏嘗與諫官論鄭誠堅執
不變時議重之性清儉純直終始一節

門巷蕭然

己卯春二月金籍諸路兵造戰具夏六月遣王
倫使金秋八月召監潭州南嶽廟朱熹不
至

庚辰春二月以普安郡王瑗為皇太子更名瑋
進封建王

辛巳春三月以吳拱知襄陽府夏五月金主亮
使人來求漢淮之地始聞靖康帝之喪以
吳璘為四川宣撫使六月劉琦為江淮湖
西制置使屯揚州金主亮遷都于汴秋九

月金主亮大舉入寇金人犯黃牛堡吳璘
出敗之遂復秦隴洮三州冬十月金人立
曹國公烏祿為帝于遼陽更名雍帝親征
詔葉義問督視江淮軍馬虞允文叅謀軍
事十一月召張浚制置建康府虞允文大
敗金師于采石金主亮趨揚州劉琦罷金
主亮為其下所殺十二月帝如建康金主
雍入燕

壬午春正月金主雍遣使來聘二月以虞允文
為川陝宣撫使帝還臨安閏月吳璘復大

散關分兵守和尚原金人走寶雞遣起居
舍人洪邁使金夏五月立建王瑋為皇太
子更名昶六月帝傳位于太子自稱太上
皇太子即位是謂孝宗詔中外臣僚陳時
政得失秋七月召張浚入朝以為江淮宣
撫使封魏國公九月罷川陝宣撫使虞允
文冬十二月詔吳玘班師

○諫官伏閣上疏請罷別宮貢獻不聽
王惑信陰陽秘祝之說每於行在集僧
道數百人常設齋醮糜費不貲帑藏虛

竭又多作別宮誅求貨財名曰別貢使
宦者監領黃線營私時旱荒疫癘道殣
相望○諫議李智深承王命署崔光勻
告身初宮人無比得幸於王生三男九
女崔光勻為無比女婿也超授八品驥
拜式目都監錄事士大夫切齒諫官不
署告身王召諫議李智深給事中朴育
和起居注尹麟瞻司諫李孝純正言梁
純靖等督署之郎舍畏縮唯唯而退有
人嘲曰莫說為司諫無言是正言口吃

為諫議悠悠何所論○冬十二月太白
經天四日○幸仁智齋即慶龍齋也親
製詩一聯云夢裏明聞真吉地扶蘇山
下別神仙遂廣開增飾日與壁幸沉醉
不恤國政諫官或請毀之王輒稱夢報
以拒之自是諫者乃止

癸未改元隆興春正月以張浚都督江淮軍馬
開府建康三月金人以書來求海泗唐鄧
商州之地及歲幣以辛次膺同知樞密院
事夏四月張浚使李顯忠邵宏淵分道伐

金五月史浩免李顯忠復靈壁遂會邵宏淵復虹縣金將士多降李顯忠復宿州李顯忠邵宏淵之師潰于符離六月貶張浚為江淮宣撫使安置李顯忠於筠州秋八月復以張浚都督江淮軍馬金人復以書來求地及歲幣詔准西安撫幹辦官盧仲賢報之冬十一月遣審議官胡昉如金軍

○貶左正言文克謙為晉州判官

甲申春正月金人執胡昉尋遣還三月張浚視師江淮金軍退夏四月罷張浚判福州秋

八月遣宗正少卿魏杞使金冬十月金兵復渡淮十一月魏勝拒戰于淮陽敗績死之楚州陷湯思退以罪竄州

○冬十一月陰霧四塞行者失路太史奏五行志霧者衆邪之氣連日不解其國昏亂霧起十步外不見人是謂晝昏

占曰破國今陛下處非其位任非其人

明堂久曠而不居天災可懼而不省移徙無常彌令不時故有此異王竟不悟

乙酉改元乾道春三月魏杞還自金始正敵國

禮

○金大夫營主遣銳卒攻麟靜二州境內之島執防守別將元尚等十六人以歸○王滂于游宴惟日不足稍遇佳境輒構亭臺於是金敦中重修觀瀾寺經以祝釐督發坊民遍植松杉於寺此童山等壇為御室節以金碧敦中宴於西臺王與宰輔侍臣酣飲盡歡厚賜敦中而已鄭誠祝釐於奉靈寺饗王供辦遠勝觀瀾王醉自吹笙因問知音者於左

右以及第李鴻升對即召至前命之吹
笙欣然歎相見之晚遂屬內侍又搆衆
羨亭于清靈齋南麓亭之南澗貯水成
池岸上作茅亭鳧鴈蘆葦宛如江湖之
狀又有龍淵寺南石壁臨水削立數仞
曰虎巖亭側名延福竒花異木列植四
隅等堤為湖每當泛舟於南池石壁也
伎樂滿載百戲備呈別令小童棹歌漁
唱互答於遠浦間沿流上下侵夜忘返
其他以勝致名者曰萬春亭靈德亭壽

樂堂鮮碧齋玉笋亭橋曰錦花門曰水
德風亭水榭羅絡於山磤不可殫記皆
由嬖倖近習如朴懷俊劉莊白善淵輩
從吏媚悅爭竒闖巧病民傷財凡三年
而告成衆羨亭之役也有一卒貧不能
自給每食役徒分與一匙一日其妻來
餉且曰宜召所親共之卒曰家貧何以
辦備將私於人而得之乎豈竊人所有
乎妻曰貌醜誰與私性拙安能盜但剪
髮買來耳因示其首卒嗚咽不能食聞

者悲之王與宰臣文士如崔哀僞許洪
材李復基韓賴及詩僧覺倪遊必共之
賦詩酣飲無虛日或觀水戲於江上或
月夜微行於寺院或如南京或遊西都
出幸不時日再三移御自朝達曙君臣
沉醉扈從壯士困疲生嗔鄭仲夫李義
方之徒聚首密語曰今日文臣得意醉
飽武臣皆飢困是可忍乎遂構凶謀矣
○王一日自歸法寺幸玄花寺馳馬至
瀨嶺茶院從臣皆莫及王獨倚柱謂侍

者曰鄭龍明若在吾豈得至此

丙戌

丁亥夏五月太傅四川宣撫使新安王吳璘卒

戊子

己丑 ○金遣使賜羊二千有一羊四角樞密

使李公升以為瑞獸表賀時人嘲為四

角承宣

庚寅夏五月陳俊卿罷閏月起居范大成為金

國祈請使

○春正月朔王受賀於大觀殿親製臣

僚賀表宣示羣臣百官乃表賀○一月
狼星見于南極西海道按察使朴純掇
以為老人星馳奏王親醮老人星于內
殿忠州副使崔光勻奏前月祭老人星
于竹杖寺其夕壽星見王大喜百官稱
賀王宴叅官以上親制樂章命工歌之
結綵綳陳百戲夜分乃罷○王幸延福
亭群臣皆占所見之物為嘉瑞蓬艾三
莖生於亭以為瑞草內侍黃文莊指水
鳥為玄鶴作詩讚之王稱歎和詩拜國

子博士直翰林○水州民耕田得金一錠狀如龜知州使吳錄之取以獻左右呼萬歲曰天降金龜聖德之應群臣皆賀○秋八月王幸普賢院武臣鄭仲夫李義方李高等作亂大殺扈從文官宦寺遣兵殺留都文官以王還宮○九月鄭仲夫李義方李高等放王于巨濟縣太子于珍島殺太孫迎王弟翼陽公皓即位是為明宗光孝王○遣工部郎中庾應圭如金上前王讓弟表

辛卯春正月帝作敬天圖二月立恭王惇為皇太子三月以張說為簽書樞密院事未拜而罷

○李義方殺大將軍韓順將軍韓恭甲大興史直哉○李高與僧修惠等謀叛伏誅○金遣詢問使完顏靖來賜前王詔曰述前王之遺囑讓母弟而相傳尚慮未出於誠心是用往頒於詔問王稱前王已避位出居他所病篤不能就位拜命路又險遠非使者所宜往靖不得

見前王王乃具前王表附靖還○左諫
議金莘尹右諫議金甫當左散騎常侍
李紹膺左司諫李應招左正言崔謹等
上疏以為前朝宰相崔允儀諫議李元
膺中丞吳仲正等署宦官鄭誠告身西
海按察使朴純嘏妄奏老人星見知水
州吳錄之妄獻金龜之瑞請皆禁錮于
孫且承宣王之喉舌但出納惟允可也
今李俊儀文克謙職兼臺省居中用事
請解兼官允之惟俊儀克謙事不允臺

官伏閣力爭俊儀因醉使巡檢軍辱之
王聞之召俊儀慰解因諫官于隍城左
遷莘尹甫當應招等黨改俊儀為衛尉
少卿克謙大府少卿○九月辛卯日有
黑子大如桃戊午又如是○宮闕災鄭
仲夫李俊儀李義方等恐有變閉紫城
門不納救火人殿宇悉火王出山呼亭
痛哭庾應圭詣景靈殿抱五室祖真以
出又至中書省出國印

壬辰春二月復以張說簽書樞密院事罷侍御

史李衡等四人秋七月罷虞允文為四川
宣撫使

○五月金遣使冊王○西北面兵馬使
大將軍宋有仁乞解以于學儒代之自
庚寅之後此人橫恣昌州人殺其守愛
妓成州人議滅三登縣有不從者殺數
十人鐵州人議殺其長格闔而死有仁
不能制恐禍及已稱疾乞代學儒亦不
能制

癸巳 ○秋八月東北面兵馬使諫議大夫金

南當起兵於東畧討鄭仲夫等謀復前
王不克死之○制三京四都護八牧郡
縣館驛之任並用武人○冬十月李義
收弒前王子慶州

康節先生皇極經世書東史補編通載卷之七

康節先生皇極經世言東史補編通載卷之八
經世之已二千二百七十四

東陽申翊聖編

甲午宋孝宗十四年

高麗光孝三九年

秋八月張說免

春正月重光弘護歸法弘化等寺僧
二千餘人集城東門門閉乃燒城外人
家欲延燒崇仁門入殺義方兄弟義方
知之集府兵斬僧百餘府兵亦多死者
遣兵破重光等五六寺李俊義止之義

方怒不從遂焚其寺取貨財器皿俊義
罵義方曰汝有三大惡放君而弑之取
其第宅姬妾一也贅奸太后女弟二也
專擅國政三也義方大怒拔劍欲殺之
文克謙止之曰以弟殺兄惡莫大焉何
面目見人乎若吾言不可聽請先殺我
義方與克謙善且其弟隣為克謙女婿
故從其言俊義走出義方引劍割其脣
而卧鄭仲夫曰兄弟鬪於宮中何理耶
欲執俊義殺之仲夫妻聞之使人謂曰

義方兄弟之事於卿何與由是俊義得
免⊗太子納李義方女為妃⊗秋九月
西京留守趙位寵起兵謀討義方仲夫
檄召兩界諸城岳嶺以社四十餘城皆
應之獨延州人玄德秀數位寵罪遂與
州將向闕羅拜連呼萬歲閉城固守位
寵移牒延州將舉兵問其不至之罪於
是城中推德秀主兵馬德秀遣兵擒賣
牒者殺之位寵再牒恐以禍福州人頗
恇恇德秀用智計鎮定分兵屯守諸門

是後位寵兵屢攻延州德秀再擊破之

遣平章事尹鱗瞻率三萬擊位寵至

岳嶺與戰敗績位寵兵陷和州兵馬

副使崔均死之均時以指揮使在東

路聞副使之命即入和州營是夜敵兵

至部將李据開門納之均與兵馬使李

儀御史智仁挺被執罵賊不屈皆遇害

李義方伏誅復命尹鱗瞻為元帥

領諸將攻西京鱗瞻謂諸將曰我聞招

駕者附于內伐叛者披其技今位寵腹

心在連州我若先攻西京則在連州者
招誘土人共為犄角我腹背受敵非計
之善也今連州負恃西都不憂我至宜
先攻連州連州若下土州諸城必皆歸
順然後率順而攻逆蔑不濟矣遂趣連
州

乙未夏四月宴輔臣于玉津園

○位罷遣將救連州官軍從間道掩擊
之前後斬二千二百餘級虜二百八十
餘人○夏五月發前王喪○後軍總管

朴景昇以連州久不下積土城外樹大
砲攻城拔之於是諸城皆復迎降遂移
師攻西京從鱗瞻策圍城持久使之招
懷降附

丙申夏六月召朱熹為秘書郎不至

公州鳴鶴所民亡伊亡所伊等嘯聚
黨與自稱山行兵馬使攻陷公州命大
將軍丁黃載等討之戰不利東海水
黃濁三月變為血色六月尹鱗瞻與
兵馬副使杜景昇攻拔西京擒位罷斬

之函其首送京師梟示並送位寵妻孥
及俘獲百餘人餘民悉安堵如故南
賊攻陷禮山殺監務遣大將鄭世敵李
夫分左右道往討之初西北諸城皆
赴位寵宣州鄉貢進士房瑞鸞謂其兄
孝珎得齡曰今位寵脅誘諸城土豪偽
署官職我曹亦預其中位寵所謀不止
討賊若不改圖恐同惡流醜今欲率先
唱義去逆効順州人皆服有郎將義儒
受偽署將軍獨不可孝珎狙射斃之即

遣人告義州州人亦殺偽酋景綽等以
應從間道賫賊首飛報行營諸城聞之
皆罷兵事聞王嘉之賜孝珵瑞鸞爵

丁酉春正月侍御史謝廓然請禁有司毋以程
頤王安石之說取士

六月辛卯震太廟亡伊等來降賜
廩粟命御史押送其鄉亡伊等復叛寇
黃驪縣又寇鎮州陷牙州秋七月兵馬
使鄭世猷捕亡伊等時處處盜起義靜
二州叛位寵餘衆五百餘人作亂殺留

守判官賊首金旦乍降復叛西路梗塞
金使遲來亦由他路我國護行人多被
害初西賊分為三軍首尾行劫嘗攻焚
義肅二州又屠妙德香山諸寺朝廷遣
兵討之屢戰失利大將朴齊儉為兵馬
使聞賊飢窘有納款之意遣人招諭諸
賊相率來降齊儉輒拊循之曰汝等皆
吾赤子也開倉賑之分處龜連等州使
之安業獨中軍行首進國不降率其黨
百五十餘人欲投吐蕃齊儉盡擒斬之

王御便殿引見東西兩界諸城上長
都令等各賜匹段錦衣金帶馬一匹
鄭仲夫致仕以宋有仁為門下侍郎平
章事時閔令謨先為中書侍郎平章事
以有仁武臣使氣又為仲夫婿心憚之
班令謨上有仁固讓有仁嘗請壽德宮
居之棟宇壯麗擬於王室

戊戌春二月右文殿修撰張斌卒

己亥 九月將軍慶大升與所善勇士許升

謀率死士夜入宮殺平景伯等請王發

禁軍分捕鄭仲夫及宋有仁父子悉斬
之梟首于市○大升自去鄭宋以來心
不自保招集死士百數十人留養門下
號曰都房常令數人潛伺里巷偶聞飛
語輒囚鞠累起大獄為長枕大被令壯
士輪直于家或自共被以示誠款許升
等恃功蹇偃陰養惡小昵侍東宮寢卧
後壁歌呼徹夜大升忌之召升于其第
斬之又殺牽龍金光立詣闕奏升等欲
殺臣圖不軌不暇稟誅王命近臣慰諭

宰相以下賀其第大升稍自安罷兵衛

○內嬖明春死王失聲號哭

庚子

辛丑秋七月著作郎呂祖謙卒八月以王淮為

右丞相兼樞察使

○詔往年十道察訪使黜陟官更多者

率戾其誤被罪罰者悉原免依舊叙用

先是國家遣按察使巡察州縣春秋更

代又遣察訪使黜陟之自仁宗壬戌不

遣察訪唯委按察不能彈舉官吏侵漁

民多受弊歲戊戌宋有仁李光挺等建
議復遣察訪使官吏坐贓落職者九百
九十人悉皆錄籍於是共出銀五十餘
斤賂鄭仲夫求去其籍未果而敗後大
賂權貴請去之猶未得至是用事者指
言天譴屢彰訛言謾興皆因冤濫所致
下詔原之○冢宰閔令謨性訥怯少屬
操履判兵部李光挺貪頑無識銓注猥
濫郎舍奏舊制文吏散官補外者皆有
年限今或一二年而起受或三十餘年

而不調政濫人怨請依年限制韓文俊
之徒力排其議

壬寅秋九月以朱熹為江西提刑熹不拜

癸卯夏六月監察御史陳賈請禁道學

甲辰 ○召還李義敗義敗畏慶大升歸慶州

屢召不至王懼其為亂遣中使敦諭乃

至引見便殿○以鄭邦佑知御史臺事

鄭允當為吏部員外郎李居正為左正

言邦祐起自典吏特授臺憲不滿人意

允當年少無知其父世祐為兵馬使欽

民財貨連獻內府有是拜居正無他才
能林民庇與居正有舊薦之王乃授之
王用人唯與近習議親署察官以上封
付政曹名曰下批由是奔競成風嬖倖
有所請王問得賂幾何多則喜從其請
否則遲延時日

乙巳

○春正月甲午日有黑子大如梨○兵
部尚書朴純弼大營私第於東宮傍太
子告曰朴尚書第為月建方不宜營造
臣力不能禁請上禁之王曰朴尚書不

必聽我言聞者莫不憤嘆○命文臣製
瀟湘八景詩倣其意摹寫為首

丙午

○秘書監崔陟卿卒陟卿性廉介嘗補
京山府判官秩滿還京足不至公卿之
門者十餘年崔允儀判吏部知其清直
拜耽羅令以鎮擴俗陟卿興利革弊民
皆安之及還允儀已死居京三年貧不
自存將挈家歸鄉會耽羅人苦令尉暴
政以反乃曰如得陟卿當釋兵王闡之
即除耽羅令邑人見陟卿皆投戈羅拜

安堵如舊凡所至皆有聲績清名勁節
老而不衰○制曰民惟邦本本固邦寧
比來守令刻剥其民所無畏忌流離日
多予心悼焉惟爾有司痛徵貪吏如有
誅求受賂者雖微重論○九月辛酉鎮
星犯歲太史奏恐有內亂請設佛頂消
災道場又於明仁殿講仁王經以禳之
○以上將軍崔世輔同修國史時有人
訴重房曰修國史文克謙直書毅宗被
弒事宜令武臣兼之克謙聞之懼密奏

於王王不敢違武臣意

丁未秋九月太上皇崩帝致喪三年冬十一月

詔皇太子察決庶務

○秋七月晦日有食之是夜工部尚書

曹元正上將軍石隣等謀逆亂伏誅初

元正在近密貪暴愈甚奪中書省公解

田祖文克謙請治其罪章凡五上乃左

遷其子英植英迪等元正嚙之石隣者

素寒賤庚寅之亂以禁軍助李義方擢

郎將遂顯嘗憾西海道按察使姜用儒

不從其請誣搆請罷王不聽隣怒瞋目
張拳解帶投地而去王遣內豎勸留又
命尚書梁翼京挽袖懇喻然後乃入內
殿王溫言慰解隣猶偃蹇不朝日食之
夜有賊七十餘人踰垣入宮格殺樞密
使梁翼京等發內侍院擯出燭照之所
至輒殺承宣權節平知賊徒無繼者乃
出北門到街衢召兵至宮門外譁噪動
地賊懼走出西門中郎將高安祐聞變
赴闕至市擒獲邊見一髡詐為病乞兒

卧糞壤中即收捕有紅燭跋在腰間囚
繫鞫問乃曹元正怨文克謙與石隣石
冲等謀遣其家臣作亂也王命刑部按
問具服逮捕曹石等及其黨三十餘人
悉誅之

戊申六月以朱熹為兵部郎中官未上而罷冬
十二月以朱熹為崇政殿說書熹辭不至
○秋七月定張宣豫高和六州大雨漂
盡民屋又鎮溟境內黃虫食鼠隨雨而
下大損禾稼八月登文宣三州鎮溟龍

津寧仁等諸城大雨損禾漂蕩城郭民
死者衆發倉賑之

己酉春二月帝傳位于太子太子即位是謂光
宗皇帝尊帝為壽聖皇帝立皇后李氏

庚戌改元紹興春二月殿中侍御史劉光祖乞
禁議道學者

○平章事韓文俊卒文俊性雅正能屬
文才名聞世歷寧州郡皆有惠政興選
吏兵益叙平允三掌禮闈所取多名士
七十謝事日與高人韻士逍遙賦詩

貞懿

辛亥冬十二月帝有疾

○政堂文學李知命卒知命博覽群書
善詞賦工草隸年十八擢第調黃州書
記居官廉直賑活飢民甚衆為相有古
大臣風再掌禮闈若趙冲韓光衍李奎
報俞升朝劉冲基皆其所取世以得人
稱之○以社景升判吏部監修國史李
義敗判兵部金永存知樞密院孫碩王
度為樞密副使

壬子春三月帝瘵群臣請朝重華宮不果行冬
十一月南至越六日帝始朝重華宮

癸丑夏五月賜禮部進士陳亮及第秋七月以
趙汝愚知樞密院事九月群臣請朝重華
宮不聽冬十月始朝以朱熹知潭州

○大將軍金存傑自殺時南賊蜂起金
汝彌據雲門孝心據草田嘯聚亡命剽
掠州縣三命存傑率將軍李至純等討
之至純義敗子也義敗嘗夢兩電起兩
腋頗自負又聞古讖龍孫十二盡更有

十八子之語因懷非望與沙彌孝心等
通至純輒泄官軍動靜故以至屢敗存
傑曰以法治之則其父必害我否則賊
蓋熾遂仰藥而死後賊魁諸闕請降金
沙彌投行營請降斬之左道兵馬使崔
仁擊賊于江陵斬百五十級南路兵馬
使擊賊于密城斬獲七千餘級

甲寅春正月壽皇有疾夏四月帝及后幸玉津

園群臣請帝問疾重華宮不從五月壽皇
疾大漸詔嘉王擴問疾重華宮六月壽皇

崩帝稱疾不出留正等請壽聖皇太后代
行喪禮尊壽聖皇太后為太皇太后秋七
月留正請建太子不許遂稱疾而遁太皇
太后詔嘉王擴成服即位尊帝為太上皇
帝復詔留正赴朝堂議事加知閣門事韓
侂胄為汝州防禦使八月朱熹至以為煥
章閣待制熹侍講內批罷左丞相留正以
趙汝愚為右丞相冬十月內批以謝深甫
為御史中丞劉德秀為監察御史罷正言
黃度十一月內批罷煥章閣待制熹侍講

朱熹十二月以趙彥愈為泗川制置使

乙卯改元慶元春三月罷右丞相趙汝愚夏四

月流太學生楊宏中等六人六月右正言

劉德秀乞考核邪正真偽遂罷國子司業

汪遠等冬十一月竄故相趙汝愚於永州

汝愚至衡州暴卒

丙辰春二月以端明殿學士葉翥知貢舉秋七

月罷殿中侍御史黃誦禁用偽學之黨冬

十二月削秘閣修撰朱熹官竄處士蔡元

定於道州

○將軍崔忠獻與其弟忠粹發兵誅李
義收大殺朝臣

丁巳冬十二月籍偽學

○秋九月崔忠獻廢王幽于昌樂宮太
子于江華立平涼公敢是為神宗靖孝
王先是忠獻與忠粹及朴晉材謀廢主
設醮告天天大雷電兩雹暴風拔木毀
屋至是日又大雷電崔忠獻為靖國功
臣三韓大匡上將軍忠粹賜功臣大將
軍朴晉材刑部侍郎趙永仁判吏部事

竒洪壽判兵部事○社景升卒于紫燕
島忠獻欲廢主流景升景升性質直寬
厚少文有勇力初為牽龍庚寅之亂武
人多劫奪入財景升獨不離殿門秋毫
不犯金甬當位罷之後征戰有功封功
臣掌吏部銓注雖內寵權貴莫敢搖之
至是憂憤嘔血死

戊午慶元四年秋八月以謝深甫知樞密院事
許及之同知院事育太祖十世孫與憲於
宮中賜名曦以趙師畢為工部侍郎

○崔忠獻捕私黨萬積等百餘人投之
江○負外郎趙通以前王讓位表如金
至是還繼而金宣問使孫俛來詰遜位
事必欲親見前王授詔門下侍郎趙永
仁曰前王養疾南州計程三十日乃至
俛曰苟如是不必親授遂傳詔于王
已未秋八月帝始朝太上皇帝於壽康宮九月
加韓侂胄少師封平原王

○金遣使冊王○冬十月雷俄而怪氣
赤黑從鵠嶺出彌滿京都咫尺不見人

庚申春閏二月以河澹知樞密院事三月故秘閣修撰朱熹卒秋八月太上皇崩九月處士呂祖泰上書請誅韓侂胄詔配祖泰于

欽州

○晉州吏鄭方義鄭昌大等聚眾作亂殺所素仇怨者六千四百人州牧使李淳中等懼閉閣不出朝廷聞之流淳中遣少府監趙通等安撫晉州通等畏虐焰拱手而已時陝州有賊亦豪橫為一方巨害晉人與方義仇者往投陝賊請

兵欲擊至晉方義出擊破之盡殺其黨

辛酉改元嘉泰秋八月以程松同知樞密院事

○刑部尚書閔湜卒湜令謨之子豁達

有大度明宗時少君招權納賂朝士爭

附獨湜不逞其第○崔忠獻兼吏兵尚

書御史大夫出入禁闈以兵自衛在私

第與吏兵負外郎盧瑄注擬文武官以

奏王額之二部判事但檢閱而已

壬戌春二月弛偽學黨禁復諸貶謫者官

○門下侍中趙永仁卒永仁博學善屬

文必時魁然有宰相器後配享王廟○
前王薨于昌樂宮○慶州別抄軍聚黨
攻永州忠獻遣諸將大發兵往擊賊聞
之募集雲門山及蔚珍草田賊分為三
軍自稱正國兵馬誘贛州郡數年乃討
平之

癸亥

經世之午二千二百七十五

甲子宋寧宗十年○高麗靖孝王七年

春正月韓侂胄定議伐金

○春正月乙丑朔日有黑子者三日王
患疇疽忠獻受王命立太子諤是為熙
宗成孝王前王尋慶○降東京留守知
慶州事陞安東為大都護府以忠獻守
大師同中書門下平章事判兵部御史
臺事○韓惟漢隱于智異山

乙丑改元開禧秋七月詔韓侂胄平章軍國事
以蘇師朝為安邊軍節度使領閣門事九
月以丘密為江淮宣撫使密辭不拜

○賜崔忠獻功臣號門下侍中晉康郡

開國侯

丙寅夏五月下詔伐金秋七月蘇師朝有罪安
置韶州金僕撒揆分兵入寇十一月以丘
密簽書樞密院事督視江淮軍馬十二月
丘密遣使如金軍議和金僕撒揆還師下
蔡以畢再遇權山東京東招撫使蒙古奇
渥溫鐵木真稱帝於幹難州

○忠獻奏諸道流配者量移放免幾三
百餘人○以忠獻為中書令晉康公

丁卯春二月以方信孺為國信所叅議官如金

軍秋九月貶方信孺官遣右司郎中王栻
如金軍冬十一月禮部侍郎史彌遠誅韓
侂胄于玉津園詔暴侂胄罪惡於中外立
榮王曦為皇太子更名熈

戊辰改元嘉定春正月王栻還自汴三月以韓
侂胄蘇師朝首畀金秋九月金遣使來和
議成

○王移御崔瑀家忠獻迎駕獻壽于澗
洞之私第諸王宰樞皆侍宴錦繡綵棚
胡漢雜戲窮極侈異不可言狀○詔往

年聖考附廟之日改定昭穆位序垂戾
令宰侍文士據典禮各上封事

己巳

○遣上將軍金元傑如金賀即位九月

忠獻會賓客設重陽宴使都房有力者
手搏勝者即授校尉隊正以賞之○召

明宗太子壽于江華封漢南公改名貞

庚午冬十二月蒙古侵金

辛未秋八月蒙古攻西京留守紇石烈胡沙虎

棄城遁金西北諸州皆降蒙古

○冬十二月忠獻廢王遷紫燕島王與

王濬明于承慶等謀去忠獻事泄見廢
奉立漢南公貞改名俱是為康宗元孝
王

壬申秋七月雷雨大廟屋壞

○遣使如金金遣使冊王金使完顏惟
基欲入自儀鳳正門知奏事參儀往諭
曰當入自何門惟基笑曰天子出入捨
中門而何儀曰然則入臣自正門可乎
惟基大服其言乃自入西門○平章事
任濡卒濡元厚之子性恬淡慈和不以

勢位矯人歷仕五朝居官勤恪久掌制
誥高文大冊皆出其手四闢文闡所舉
皆名士

癸酉秋八月金胡沙虎弒其主永濟而立昇王
珣十月蒙古敗金將木虎高琪於懷來進
圍燕高琪還殺胡沙虎十二月蒙古分兵
拒金河北河東諸州郡

○王薨太子暉受遺詔即位是為高宗
安孝王

甲戌春二月金以其故主永濟之女歸蒙古夏

四月及蒙古平五月金主珣往都汴秋七月蒙古復圍燕罷金歲幣

乙亥春三月金主遣兵救燕與蒙古兵遇於霸州大潰夏五月中都留守右丞相完顏承暉自殺蒙古遂入燕冬十一月以真德秀為江東轉運副使

○崔忠獻移入別第劔戟兵衛彌滿數里朝士追隨者衆○兵部尚書致仕玄德秀卒德秀鐵面犀骨有膽畧意氣自高言笑過大人或譏之嘗調安南為政

廉明民吏敬畏尤惡淫祀巫覡不得入
境○忠獻以李奎報為正言

丙子

○契丹遺種金山王子金始王子賈河

朔之民自稱大遼收國王建元天成避

蒙兵席卷而東豎黃旗渡江攻掠寧朔

闡入義靜雲燕等州皆以妻子自隨彌

滿山野月餘食盡移入雲中道遣上將

軍盧元純大將軍金就礪統三軍禦之

後軍郎將丁純祐突入賊中斬持纛者

丹兵奔潰追斬八十餘級并獲楊水尺

一人○丹兵屯延州之開平原金就礪奮擊大敗之三軍又接戰于渭州敗績將軍李陽升等千餘人死

丁丑夏四月金人分道入寇六月詔伐金

○五軍潰于太祖灘大將軍李義儒等皆戰死元帥趙冲等奔還明年復以趙

冲金就礪為兵馬使擊丹賊蒙古元帥

哈真遣使我軍約同討契丹○遷太廟

神主于太常府太祖世宗梓宮于奉恩

寺○納熙宗女為妃○崔忠獻殺校尉

孫永等十人永等嘗醜飲於市嘆曰頃
與丹兵戰有功無賂不得爵有人告忠
獻忠獻遣家兵捕之并其黨百餘人斬
之○賜忠獻姓王氏

戊寅冬十二月金主珣遣使來求和不納遂使
其太子守緒會兵入寇

己卯 ○忠獻死○義州別將韓珣多智等殺

其防守將趙宣等以叛自稱元帥署置
多官諸城響應以清川江為界投東真
潛引金元帥弓哥下令屯義州自屯博

州相為聲援兵馬使金君綏與宣撫使
李公老議遣尹忠孝寄書于哥下諭以
禍福責其違盟于哥下悟陽怒即囚忠
孝等遣使召恂智恂智擁兵赴至于哥
下宣慰弁及諸城賊魁甚厚因疏其姓
名翌日伏兵設宴酒酣伏發捕恂智及
其黨悉誅之三軍請治諸城從逆之罪
金就礪曰殲厥渠魁贖從罔治大軍所
臨如火燎原無辜受禍多矣餘悉不問
王以銀酒器及帶細布五百匹米一千

石遺秀哥下以酬其功

庚辰

○平章事趙冲卒

辛巳夏六月立沂王嗣子貴和為皇子更名竑
秋九月立宗室貴誠為沂王後

○蒙古皇太弟遣著古與等來索土物
蒙古安只女大王遣這可等來王問群
臣迎接可否皆曰彼眾我寡若不迎接
必有後患王意欲設備拒不納議未決
卜于太廟這可等督國贖以金希殫知
詩禮有膽畧善辭語命為類會使以待

蒙使這可等詰其不迎接希礮曰迎迓
之禮與夫國贖等事敢不盡心然君在
都護府手射一人生死未可知若生則
君之福死則君之一行必見拘留這可
慚服一從希礮處分後又蒙使喜速不
花等來將佩弓矢赴宴上殿希礮曰自
兩國交好皆俱禮服相見今欲以鞞鞋
赴宴響如禮何即解之又為東真使館
伴東真使唱曰東君初報暖希礮即對
曰吐帝已收寒使曰有何意而賦此句

也答曰君以春意唱吾以春事和之使
不復詰

壬午春進封子竑為齊國公以貴誠為邵州防

禦使

癸未

甲申秋八月帝崩史彌遠矯詔立沂王子貴誠
更名昀是謂理宗皇帝尊皇后為皇太后
同聽政封皇子竑為濟王出居湖州九月
以真德秀直學士院魏了翁為起居郎

乙酉改元寶慶春正月湖州藩士起兵謀立濟

王竑討平之史彌遠矯詔殺竑追貶為
巴陵郡公夏四月太后以疾罷聽政秋八
月以梁成大為監察御史罷直學士院真
秀考功負外郎洪咨夔冬十一月貶魏了
翁官居住清州罷真德秀祠祿

○春蒙古使還到鴨綠江中途為盜所
殺反疑我遂與之絕

丙戌春正月贈陸九齡等官賜謚錄張弼呂祖
謙陸九淵

○西北面兵馬使金希碑與判官孫龍

卿御史宋國瞻議選步騎一萬餘人分
三軍往討石城丐哥下遣兵救之希碑
等奮擊大敗石城主率衆出降銜塊誓
天希碑數丐哥下替息之罪遂還初希
碑將發兵密以書告崔瑀乃還有司欲
劾希碑擅興師聞瑀知之遂寢

丁亥夏六月蒙古鐵木真滅夏以夏主覲歸冬
十二月蒙古鐵木真死於六盤山少子斡

雷監國

○崔瑀遷前三子喬桐殺將軍金希碑

上將軍盧之正大將軍琴輝等○遣及
第朴寅聘于日本時倭賊侵掠州縣寅
到日本諭以歷世和好不宜來侵日本
誅賊倭遂報和親牒自是邊患稍息

戊子

己丑秋八月蒙古窩濶台立

庚寅春二月起復趙葵節制鎮江滁州軍馬冬
十二月立皇后謝氏

○平章事琴儀卒儀體貌奇爽器度雄
偉少力學善屬文嘗監清道剛直不撓

民目為鐵太守與人面折人多憚之累
典貢舉世號琴學士引年乞退琴碁自
娛然諂事崔忠獻跋歷華要謚永烈○
崔瑀弟珣作亂于洪州知事敗自殺

辛卯夏五月蒙古侵金使速不罕來假道秋七
月至沔州統制張宣殺之

○蒙古元帥撒禮塔來攻咸新鎮副使
金僞防守將軍趙叔昌降叔昌謂蒙人
曰我趙元帥冲之子也吾父嘗與貴國
元帥約為兄弟乃為書諭諸鎮使迎降

兩至先呼曰真蒙使也宜速出降蒙兵
攻鐵州郎將文大判官李希勣皆拒戰
死之王以蔡松年為北界兵馬使以禦
之又徵諸道兵○蒙兵攻龜州兵馬使
朴犀分道將軍金慶孫隨機死守蒙兵
不克乃退○蒙兵攻陷龍宣郭鳳平等
州長驅而進前鋒到禮成江京城恣恣
崔瑀擁家兵守王城者皆老弱蒙兵分
屯京城四門外瑀再遣御史閔希郎中
崔國瞻犒士結和親時撒禮塔屯安北

都護府自稱權皇帝遣使來王下處北
面以迎蒙使止之王設慰宴以金銀綉
紵厚贈三元帥及使者遣淮安公佺于
撒禮塔佺遙拜階下撒禮塔移牒曰帝
命臣問高麗殺臣著古與之故仍索馬
二萬匹童男女數千人紫羅一萬匹水
獺皮一萬領於是遣大將軍趙叔昌齎
國贖金銀鞍馬偕蒙使行上表皇帝辨
殺著與等事

壬辰春正月以孟珙為京西兵馬幹轄屯棗陽

蒙古使其將速不臺圍金汴京三月金遣
曹王訛可為質于蒙古請和夏四月蒙古
退軍河洛冬十二月蒙古遣使來議伐金

○夏崔瑀廢王遷都江華殺指諭金世

冲○秋七月乙酉王發開京丙戌入江

華時霖雨彌旬泥濘沒脛人馬僵仆達

官及婦女有跣足負戴鰥寡孤獨失所

號哭○御史臺皂隸李通以開城反遣

將領三軍討誅之○金允侯射殺蒙古

元帥撒禮塔

癸巳春正月金汴京西面元帥崔立作亂以城
降蒙古夏四月金崔立執其主之后妃及
梁王從恪等送蒙古軍蒙古速不臺殺從
恪等以后妃吐還六月金主守緒走蔡州
秋九月金人乞糧不許冬十月封史彌遠
為會稽郡王奉朝請彌遠尋卒陳德剛為
福建制置使

○命上將軍李子晟討誅龍門倉賊又
遣李子晟討東京賊崔山李儒等誅之
○西京人畢賢甫洪福源等舉城叛大

將軍鄭顛死之北界兵馬使閔曦討賊
獲賢甫送京腰斬福源逃入蒙古○以
李奎報知門下省事戶部尚書集賢殿
大學士時蒙兵壓境屢加徵詰奎報久
掌兩制陳情書表帝感悟撤兵

經世之末二千二百七十六

甲午宋理宗十一年○高麗安孝王二十四年
春正月金主守緒傳位于其宗室承璘孟
珙以蒙古兵入蔡州守緒及其尚書右丞
完顏忽斜虎死之承璘為亂兵所殺金亡

三月以賈貴妃弟似道為籍田令夏四月
獻金侂子太廟論功行賞六月趙范趙葵
請復三京詔廬州金子才會兵趨汴金故
將李伯淵等誅崔立以降趙葵帥師會全
子才于汴秋七月葵將楊誼等入洛陽八
月蒙古復引兵至洛陽城下楊誼軍潰趙
葵金子才遂棄汴而歸九月召真德秀為
翰林學士魏了翁直學士院冬十二月蒙
古使王楫來

○侍中金就礪卒○奉安御衣於南京

假關○蒙兵陷龍岡咸從三登城執其
守令

乙未春正月詔孟珙屯黃州三月以真德秀參
知政事夏六月蒙古使其子闊端等分道
入寇冬十二月以魏了翁同簽書樞密院
事督視江淮京湖軍馬

丙申春三月襄陽將王旻李伯淵作亂以城降
蒙古

△蒙古兵渡義州江分屯嘉州及安址
府二州之間火氣連天遂遍茲朔龜郭

之地先鋒入黃州至信安守宰多被害
餘兵百餘自溫水南下趨車峴至全州
古阜之縣又分屯于南京至竹州克斤
湖西海隅城邑

丁酉改元嘉熙春三月詔經筵進講朱熹通鑑

綱目

○前王薨于法天精舍

戊戌秋九月以孟珙為京湖制置使冬十月珙
復郢州荆門軍

○蒙兵至東京燒黃龍寺塔○冬遣將

軍金寶鼎御史宋彥琦如蒙古上表乞

解兵蒙古遣使賫詔來諭親朝召兵還

己亥春三月孟珙復襄陽冬十二月遣兵禦蒙

兵于蜀口遂復其州以陳埴為國子司業

庚子春正月蒙古張柔等分道入寇二月以孟

珙為四川宣撫使珙遂大興屯田

辛丑改元淳化春正月詔加周敦頤張載程顥

程頤封爵與朱熹并從祀孔子廟庭黜王

安石從祀冬十一月蒙古主窩濶台卒第

六后乃馬真氏稱制

壬寅春正月蒙古復寇蜀孟珙分兵禦之蒙古

燕京行省郎中姚樞棄官隱於薊門

癸卯春正月蒙古張柔分兵屯田于襄城二月

以余玠為四川制置使

甲辰

乙巳

丙午秋七月蒙古主貴繇立九月寧武節度使

漢東公孟珙卒

○兩毒蟲○晉州副使王諧卒

丁未春三月蒙古主貴繇卒后幹兀立海迷失

稱制

戊申

己酉

○崔怡死内外都房皆歸其子沈家

庚戌

○樞密副使權守平卒守平性純厚質

直有古人風

辛亥夏六月蒙古王蒙哥立秋七月蒙古遣察

罕等將兵分道寇淮蜀

○守司空左僕射孫抃卒○崔沆獻酒

饌于王宴諸王宰樞文武官于其第以

沆為門下侍中判吏部御史臺事在家

遙謝

壬子

癸丑改元寶祐春正月詔以與芮子祺為皇子

封永嘉郡王夏五月召余玠還

○蒙兵渡鴨綠江大至水寧公縉在蒙軍貽書崔沆諭以太子若安慶公出迎則必退兵沆不聽蒙古元帥也窩魯孩兵陷西海道掠山城男女七歲者皆屠之死者四千七百餘人連陷東州春州襄州圍忠州克斥遠近候騎至全州王

命宰樞文武官議却兵之策僉曰莫如
太子出降王怒乃遣永安伯僖等致書
於也窟也窟時在忠州得病吐還永安
伯僖等追至舊京致國贖且乞退兵也
窟責云國王出江外迎吾使則兵可退
也遂遣蒙古大等十人來王渡江迎于
昇天府新闢蒙古大謂王曰自大軍入
境一日死亡幾千萬人何惜一身不早
出迎使無辜之人肝腦塗地至於此乎
自今萬世和好豈不樂哉遂酣飲而去

宰樞請遣安慶公渴乞班師王不從
知政事崔璘獨奏曰愛子之情無貴賤
一也然有不幸死別者殿下何惜一子
乎今民之存者十二三蒙兵不還則民
失三農皆投於彼雖守一江華何以為
國王不得已額之遂遣渴偕璘以行凡
進饋金銀布帛不可勝計府庫皆竭科
歛百官以充其費渴至蒙古屯所設宴
饗士京城解嚴

甲寅

○李峴伏誅籍其家沉之瑞之松等五

子于海○冬蒙古元帥車羅大攻尚州
遣門下平章事崔璘如車羅大屯所請
罷兵車羅大言崔沆奉王出陸則兵可
罷是歲蒙兵所擄男女無慮二十萬六
千八百餘人殺戮不可勝計所經煨燼
自有蒙兵之亂未有甚於此也

乙卯夏六月以丁大全為右司諫

○車羅大屯舊京保定門外又蒙兵五
十餘騎到昇天城外京城戒嚴○崔沆
進酒饌于王召太子諸王宴于內殿作

樂徹夜時蒙兵壓境餓孳相望王制於
權臣強設此宴

丙辰夏五月賜禮部進士文天祥及第六月丁
大全逐右丞相董槐提舉洞霄宮寬大學
生陳宜中等於遠州

○蒙兵謀陷諸島遣將軍李廣領舟師
禦之蒙兵南下車羅大永寧公屯潭陽
洪福源屯海陽南至海隅東至嶺南無
不被害○制下諸道被兵凋殘租賦耗
小其令州縣民人耕闢地補經費又令

文武三品以下出丁防等梯浦瓦浦狸
浦等地為左右屯田○金守剛還自蒙
古守剛從蒙主入和林城乞罷兵蒙主
不出陸為辭守剛奏曰譬如獵人追獸
入於窟穴持弓矢當前困獸何從而出
又冰雪慘澹土脉閉塞則草木豈能生
哉帝嘉之曰汝誠使乎當結兩國之好
遂命班師車羅大等收兵吐還○平章
事崔璘卒璘屢使蒙古有專對才臨絕
妻子泣曰我輩何依而生璘微笑曰爾

葦其為戎乎後俱沒戎兵果如其言

丁巳秋八月蒙古主蒙哥分道入寇以其少弟

阿里不哥守和林

○崔沆死○蒙兵三十餘騎渡清川江
趣龍岡咸從京城戒嚴時蒙兵標掠州
郡往來不絕候兵入開京至南京遣將
作監李凝請退兵蒙將云去留在車羅
大處分宰樞請遣永安公僖贈車羅大
銀瓶一百酒果等物時車羅大屯安社
府問曰何為來對曰大人召還南下兵

且禁蹂躪禾穀國王遣臣奉一觴以謝
車羅大曰太子到日當退屯鳳州宰樞
請遣太子以活民命主猶豫未決遣金
軾告曰待將軍撤回太子親朝帝所車
羅大許之復遣軾賫酒果銀幣餞之以
觀其意時內外蕭然計無所出但祈禱
佛神而已○金守剛還自蒙古蒙古主
方自將伐宋守剛見於行營懇乞回軍
許之乃遣使與守剛偕來○遣安慶公
渥如蒙古

戊午冬十一月以賈似道為樞密使兩淮宣撫

使

○柳璩與金仁俊林衍等誅崔頊復政

于王○蒙兵候騎一千入遂安屯嘉博

二州車羅大遣人以帝勅告王曰高麗

國如實出降雞犬一無所傷否則攻破

水內今國王及太子出降西京則便可

回兵王曰余既老病不可遠行乃遣永

安公僖知中樞金寶鼎如車羅大屯所

○流樞密使崔昱于黑山島昱侗僮敢

言臨事果斷仁俊聽譖搆隙啓王流之
○金寶鼎回自蒙軍傳蒙將余愁達語
云皇帝以高麗事屬我與車羅大吾以
爾國降否決去留國王雖不出迎若遣
太子迎降軍前即日便回軍是後使者
往復數四而終不出余愁達怒縱兵侵
掠○蒙古誅東京總管洪福源○秋車
羅大兵復來屯舊京侵掠四到恣行殺
擄又撒吉大王等領兵來屯古和州之
地○龍州人趙暉定州人卓青等與登

文州諸城合謀引蒙兵殺東北面兵馬使慎執平登州副使朴仁起和州副使金宣甫等於是和州迤址皆附于蒙古蒙古乃置雙城總管府于和州以暉為總管以青為千戶是後登和州叛民引蒙兵殺害本國使臣李凝等掠奪國贖處處作亂尋為我兵擊殲○柳璈既誅璈掌銓注專決機務金承俊自謂功高秩卑心常怏怏璈多置甲第權勢日熾門庭如市承俊林衍等諸功臣忌之譖

于仁俊以聞于王罷璫殺璫所善者禹
得奎等三人

己未改元開慶秋七月蒙古主蒙哥卒于合州
城下餘衆解圍赴還八月蒙古忽必烈將
兵渡淮九月渡江進圍鄂州冬十月拜賈
似道右丞相兼樞密使軍漢陽以援鄂

○以蒙兵大至令多官各陳降守之策
衆論紛紛平章事崔滋樞密使金寶鼎
曰江都地廣人稀難以固守出降便○
燃燈會宴諸王宰樞王再舉手以示群

臣曰凡赴宴者拍手以助予樂酒闌王
猶樂甚群臣拍手踊躍汗流被體至暮
乃罷○三月王不豫至夏四月疾篤移
御閔脩第承旨李應韶鄭世臣等軍國
奏啓皆抑而不納閉門圍碁擁妓酣飲
時議憤之○遣太子供奉表如蒙古以
叅知政事李材等四十人國贖馱馬三
百餘匹行○命營假闕於三郎城及神
泥洞○六月蒙古元帥松吉遣使來毀
江都城郭時太子冒大雨水至東宮蒙

古元帥松吉大王等奉帝命征高麗已發大兵及見太子聞太子言駐兵不發乃遣周者等來毀江都內外城督役甚急城郭摧折聲如疾雷街童巷婦皆為之悲泣時人以為內外城盡毀必有以也爭買舡舡價湧貴○王薨時太子俱入蒙古大將軍金仁俊初欲立安慶公卒從兩府議奉太孫諶入內權監國事○濟州副使金之錫政清如水吏民懷服先是有慶世封者守濟州亦以清白

稱州人曰前有世封後有之錫

庚申改元景定春三月賈似道奏諸路大捷召
似道還復蒙古主忽必烈立蒙古初定官
制六月立忠王祺為皇太子秋七月蒙古
使翰林侍講學士郝經來修好賈似道幽
之真州

○太孫以判禮賓寺羅得璜為濟州副

使州人語曰昔遇小盜今遇大盜○太

子在京兆府聞訃服喪三日而除○三

月太子還自蒙古即位是為元宗順孝

王改名植初憲宗皇帝南征太子自燕
京赴行在憲宗崩阿里孛可阻命朔野
人心憂疑時皇帝忽必烈觀兵江南太
子遂南轅間關迎謁於梁楚之郊烏紗
幘頭犀鞮象笏眉目如畫周旋可則皇
帝驚喜曰高麗萬里之國唐宗親征而
不能服今世子自來此天意也與俱至
開平府館待有加命達魯花赤束里太
康和尚護行歸國○遣永安公僖如蒙
古賀皇帝即帝位永安公還帝賜金虎

符國印允許表請六事是後兩國使蓋相望

辛酉

壬戌

癸亥春二月詔員公田置使領之罷翰林學士

徐經孫秋七月置權場於樊城

○遣大官署丞洪沂詹事府錄事郭玉

府如日本請禁賊艇○以李藏用守太

傅判兵部事柳敏守大保參知政事金

俊守太尉參知政事判御史臺事

經世之申二千二百七十七

甲子宋理宗四十一年○高麗順孝王五年

秋七月彗星出中外上書乞罷公田賈似
道力求去位詔勉留之八月蒙古入都于
燕冬十月帝崩太子祺即位

○蒙古遣使諭王入朝會宰樞議皆曰
不可李藏用獨曰王覲則和親否則生
釁王從其言定入朝之議○中郎將白
承賢因金俊奏造假闕於三郎城神泣
洞設五星道場則可寢親朝三韓變為

震朝大國來朝也王信之命大將軍趙
文柱等創假闕六月移御親設大日王
道場于穴口寺○秋八月王如蒙古命
金俊監國李歲用從王入朝十二月乃
還

乙丑改元咸淳夏四月加賈似道太師封魏國

公

丙寅春正月叅知政事江萬里罷

○蒙古聽趙葵言欲通知日本乃遣黑
的殷弘等來令其國為鄉導王命宋君

裴金贊與黑的等往日本至巨濟松邊
浦畏風濤而還即令君裴與黑的如蒙
古奏其故又遣黑的偕君裴來諭書以
責王又遣起居舍人藩阜賈蒙古書及
國書如日本亦阻風濤不達而返於是
蒙古欲征日本遣脫朶兒等來閱軍額
戰艦仍視日本水道黑山島○以金方
慶判禮賓省事吐界兵馬使

丁卯春正月立皇后全氏二月賈似道平章軍
國重事三日一朝治事都堂冬十二月以

呂文煥知襄陽府蒙古阿木劉整謀入寇

遂城白河口

戊辰秋九月蒙古阿木劉整圍襄陽

○誅金俊夷其族

己巳

○林衍反立安慶公湯廢王幽于別宮

西北面兵馬使營吏崔坦韓慎等以誅

林衍為名舉兵叛○十一月王復位如

蒙古命順安侯棕監國

庚午春正月以李庭芝為京湖制置大使督師

援襄樊夏四月罷直學士院文天祥秋八

月詔賈似道十日一朝不拜

○林衍死林惟茂叛伏誅○王至自蒙古還都舊京○六月將軍裴仲孫盧永禧等率三別抄叛于江華

辛未夏五月蒙古兵分道寇嘉定諸路○蒙古以許衡為集賢殿大學士兼國子祭酒冬十一月蒙古改國號曰元

○官奴崇謙攻德等聚其徒謀殺達魯花赤及本國在位者往投珍島賊事覺伏誅隊正宋思均告變將軍崔文本鞫

之俄而祗候辛佐宣見閭巷七八人偶
語韓告曰事急矣時日將暮宰樞及承
宣重房相顧失色計無所出王遣知樞
密李玄源請救於脫朶兒即與洪茶丘
等會樞密捕崇謙等十餘人按問皆服
茶丘欲使崇謙等辭連本國因謀起兵
襲取京城脫朶兒執不可於是崇謙等
四人棄市餘悉釋拜思均攝郎將○蒙
古遣忻都及史樞等伐阿海行經略司
於鳳州等處營軍屯田用為進取日本

之計以絹一萬二千三百五十匹來市
農牛於是分遣農務別監於諸道督納
農牛農器于黃鳳州○襄陽民張世金
世等謀殺守令及吏士事覺伏誅其黨
天瑞等八人潛投和州趙暉請兵四百
餘人奔入襄州執知州事欲脅遷和州
王遣人往諭天瑞不聽驅掠知州及吏
民一千餘人以去○右副承宣洪子藩
奏曰比來不親聽政凡有司章奏一委
宦豎中外缺望請復親庶政以慰輿望

王不納○金方慶忻都等討珍島大破
之時蒙兵討珍島者人馬無慮一萬八
千鳳州屯田農牛亦不下五六千其糧
餉一令本國供辦中外皆困民食草木
之實○遣世子諶入質于蒙古○達魯
花赤脫朶兒卒朶兒沉重寬厚聽斷明
白未嘗枉法及疾作國醫進藥脫朶兒
卻之曰我病殆不起若飲此藥而死則
有讒搆爾國者必曰高麗毒之遂卒國
人惜之○蒙古建國號曰大元遣使詔

告

壬申

○世子諶久留燕京以東征事請帝而還國人見世子辮髮胡服皆嘆息至有泣下者○置東西學堂以判秘書省事金軌尚書右承宣文烈為別監○太府注簿姜渭賈文習圭等祝髮而逃時太府虞竭官吏雖彈私財以供御亦不免譴責渭賈等不堪其苦辭職不許故逃去內廷宅台置御供闕一夕

癸酉春正月樊城陷守將范天順牛富死之二

月呂文煥以襄陽叛降元冬十一月以李
庭芝夏竦淮東西制置使

○西海道戰艦二十七艘至伽倻召島
遇大風敗沒南京判官任恂仁州副使
李爽等一百十五人溺死慶尚道戰艦
二十七艘亦敗○以天變放囚左承宣
洪子藩奏釋輕囚可也如奴達主子不
孝者得免奈天意何此非修德乃招災
也若欲修德莫如省大府供御之物禁
市肆侵割之害王默然○金方慶忻都

等討耽羅三別抄賊平之元置獫狁會花
赤子耽羅

甲戌秋七月帝崩于嘉國公熙即位太后臨朝
稱制八月元史天澤伯顏大舉入寇十一
月以陸秀夫參議准東制置司事十二月
元伯顏攻陽邏堡夏貴帥師拒之伯顏使
阿朮襲青山磯遂渡江元伯顏拔陽邏堡
夏貴棄師走還伯顏遂會阿朮趨鄂州鄂
州降元伯顏使行省右丞阿里德涯戍鄂
遂引東下詔賈似道都督諸路軍馬開府

臨安似道以孫虎臣搃統諸路軍詔天下
勤王李庭芝遣兵入援

○元遣提管察勿監造戰艦三百艘又
令洪茶丘監督徵集諸道工匠役徒三
萬五百餘人又發征東兵萬五千人及
漕運東京米二萬碩仍令本國發軍五
千助征日本是時驛騎絡繹軍需工餉
罔有紀極○元遣使來索婦女一百四
十人妻蠻子提挈而去哭聲滿路○五
月世子尚帝女忽都魯揭里迷失公主

○六月王不豫薨百官遙尊世子譔為
王是為忠烈王○八月王至自元謁殯
發服黃袍即位仍宴冊封使○九月壬
午王詣大行王殯殿始服斬衰麻經塗
群臣哭乙酉葬昭陵釋服○冬十月金
方慶領諸將與元都元帥忽敦等征日
本至一歧島擊倭大敗之○遣奇蘊如
元迎公主王親幸西址面迎之以胡服
同輦入國

乙亥改元德祐春正月賈似道出師次于蕪湖

二月夏貴引兵會之以汪立信為江淮招討使募兵禦元賈似道復請和于元伯顏不許元陷池州權守趙昂發死之孫虎臣夏貴之師潰于江上賈似道奔揚州元盡陷江淮州郡元陷饒州知州事唐震故相江萬里死之江西提刑文天祥起兵勤王遣元行人郝經還經至燕卒賈似道有罪免端明殿學士江淮招討使汪立信卒于軍三月元伯顏入建康詔張世傑扞都督府諸軍世傑分道出兵以拒元有二星闕

于中天一星隕夏四月元阿里海涯寇江陵朱禩孫高達以城降荆南州郡皆陷六月成都安撫使咎萬壽以嘉定諸城叛降元秋七月張世傑與元阿朮戰進山下世傑敗績奔圖山放賈似道于循州籍其家八月以文天祥知平江府冬十月元伯顏渡江分兵東下十二月遣工部侍郎柳岳如元軍請平伯顏不許

○冊公主為元成公主○太府卿朴楡上疏言我國男小女多而尊卑止於一

妻其無子者亦不敢畜妾異國人來娶
妾無定限臣恐人物皆將址流宜令臣
僚許娶庶妾隨品降殺庶人亦得娶一
妻一妾其庶所生子皆比嫡子得任子
朝怨曠以消戶口日增疏上有宰相畏
妻者寢其議○王及公主幸址山洛山
寺自是屢幸寺院至於出獵遊觀公主
無不與焉○罷全羅道按察使安戩長
興府使辛佐宣時鷹坊吳淑富等怙勢
肆暴戾及佐宣疾之不禮淑富等請王

罷之後承宣李汾成言於王曰淑富多
行不法戩等不從其欲今聽淑富譖罪
戩等豈不累聖德王曰予固疑之○禁
白衣太史局言東方木位也色當尚青
而白者金之色也國人自易服多楊以
白苧之衣木制於金之象也請禁白色
從之○初作宣傳消息舊制凡命令徵
求必下宣旨王即位宣旨頻煩州郡疲
於迎命李汾成建白小事不足煩宣旨
請令承宣奉王旨作書署名紙尾發下

諸道按察守令謂之消息於是消息蜂
午州郡苦之○王問李汾成曰聞中郎
將以不得臨民之任為憾今欲交差如
何對曰武人有吏才知民事者蓋寡如
有才無文武寬猛相濟者無論東西使
之臨民可也王納之庚癸以來權臣柄
國始以武官補外及承宣朴垣掌銓注
言於王曰東班必補外然後得授朝官
西班循次以進不必補外至是武官托
左右請復之○定朝官服章○改定官

制

丙子改元景炎春正月元阿里海涯破潭州湖南鎮撫使李希死之湖南州皆陷遣監察御史劉岳奉表稱臣于元進封言王是為益王判福州信王昺為廣王判泉州元伯顏軍臯亭山太皇太后遣使奉璽書以降右丞相陳宜中夜遁吳堅文天祥如元軍伯顏執天祥遣堅還駙馬都尉楊鎮等奉益王廣王走婺州張弘範等齎宋舊臣表至軍前三月丁酉朔日中有黑子相盪帝

率百官望元闕上表乞為藩輔元伯顏進
屯湖州賈餘慶為右丞相樞密使與劉昂
吳堅謝堂家鉉翁并充祈請使如元元人
索宮女內侍及諸樂官宮女多赴水死三
月元伯顏入臨安帝及宮主諸王三學生
皆北行太學生徐應鑣與其子琦崧女元
娘死之文天祥夜亡入真州由通州泛海
以求二王元伯顏北還帝北行至瓜州李
庭芝妻才苗再成等謀奪駕不克五月益
王即位于福州改元景炎遥上帝尊號為

孝恭懿聖皇帝又上太皇太后尊號冊揚
淑妃為皇太妃同聽政升福州為福安府
以大都督府為垂拱殿王剛中知福安府
是日大聲出府中衆皆驚仆進封弟昺為
衛王以陳宜中為左丞相兼樞密使都督
諸路軍馬陳文龍劉黼參知政事張世傑
為樞密副使陸秀夫直學士院召李庭芝
為右丞相姜才為保康軍承宣使文天祥
至自温州以為樞密使同都督諸路軍馬
元忽必烈廢德祐帝為瀛國公秋七月文

天祥開府南劍州經畧江西李庭芝姜才
赴召至泰州揚州守將朱煥泰州裨將孫
貴等皆降元庭芝才死之淮東盡陷八月
元人以太皇太后謝氏去九月元軍分
道寇閩廣陳宜中張世傑奉帝航海帝至
泉州招討使蒲壽庚作亂帝走湖州庚以
泉州叛降元元人入興化軍知軍事陳文
龍死之帝次惠州遣使奉表請降于元

○改宣旨曰三旨朕曰孤赦曰宥奏曰
呈僉議府上言內僚微賤者皆以隨從

之勞許通仕路混雜朝班有乖祖宗之
制請收戍命王怒因詔文主事命右正
言李仁挺勿視事○王與公主如興王
寺公主取黃金塔入內將毀用之王禁
不得但流涕而已又令勿刺豸括大府
寺銀入內置通文館令禁內學館七品
以下年未滿四十者習漢語○密直副
使崔文本卒文本惟清之後姿容魁梧
性高倨沉重不苟俯仰有大臣體○叅
文學士俞千遇卒千遇聰敏多機辯為

崔怡門客多受人饋遺言與行違睚眦
必報嘗為史官不修史曰當時國事皆
晉陽公所為吾蒙厚恩何敢傳其惡於
後世耶○滇州吏金遷得毋於遼陽以
歸○金方慶賀聖節至元奉幣禮畢
宋幼主後至帝命坐皇太子下有司請
方慶與宋群臣坐次帝曰高麗慕義自
來宋力屈乃降何可同也皆下坐賜方
慶金符○僉義府言公主怯冷口及內
僚廣占良田多受賜牌不納租稅請收

還不聽

丁丑冬十月以陸秀夫同簽書樞密院事

○秋七月停營繕縱鷹鵠還金塔子興
王寺先是觀候署言道說秘記稀山為
高樓多山為平屋我國若作高樓必招
衰損故太祖以來非准宮闕不高至於
民家悉禁今聞造成都監用上國規模
欲作層樓高屋恐將有不測之災伍允
孚亦言於公主曰天變屢見請弛營繕
是日王恭得疾彌劇宰樞請停營繕縱

鷹鷄興三寺金塔在宮中請還之公主
皆許王大喜○王移御天孝寺王先行
公主以陪從寡小怒還王不得已亦還
公主以杖迎擊之至天孝寺又以王不
得已先入且詬且擊欲還竹坂宮聽侍
臣廉承益之言乃止○內豎梁善等告
曰慶昌宮主與其子順安公琮謀令僧
僧呪詛上欲使琮尚公主為王王乃召
琮親訊宰樞詣宮門請釋公主請王籍
其家初元宗愛琮贈貨寶無算至是公

主盡取遣使告于元帝任王慶置廢宮
主為庶人流琮海島

戊寅改元祥興夏四月帝崩魏王即位六月帝
遷新會之崖山冬閏十一月元張弘範襲
執文天祥于五坡嶺

○流金方慶于大青島右司議鄭興辭
職歸羅州時李汾僖兄弟附茶丘醞釀
金方慶之罪興恥與同朝乞歸養母王
慰諭遣之尋召還○令境內服元衣冠
○王及公主如元王上壽于帝帝問官

軍搔擾狀命罷忻都茶丘軍合浦鎮戍
軍皆還○九月王與公主至自元凡國
家弊事王奏請除之國人頌德感泣是
後王及公主連年八元或一歲乘入○
流李汾僖李楷于海島尋殺之楷恃寵
政有不便必爭之內僚請謁皆杜絕其
徒切齒會韋得儒事起汾僖潛詣茶丘
楷亦勸王勿令方慶知國人謂楷兄弟
有二心至是內僚諷王召方慶密議流
二人俄聽諧沉于海楷曰吾以兄故死

人皆惜之○新置必闈赤以朴恒金周
鼎李之氏等為之又以內僚鄭承伍等
五人為申聞色舊制凡國家事宰樞會
議令承宣稟旨而行周鼎建議今宰樞
既衆無適謀政宜別置必闈赤委以機
務又內僚不可皆令啓事當更擇人為
申聞色自是恒等常會禁中參決機務
號別廳

巳卯春正月元張弘範襲厓山張世傑力戰禦
之二月張世傑與元張弘範戰于厓山世

傑兵潰陸秀夫負帝赴海死之世傑收兵
至海陵山舟覆而死宋亡冬十月文天祥
至燕不屈元人囚之

○作新宮于竹坂洞撤民家三百餘戶

○用樂祀新殿驚尾○日本倭人殺元

使初帝遣使日本王令舌人徐贊及梢

二上佐等三十餘人道守行倭人皆殺之

惟上佐等四人逃還○遣許珙于慶尚

道洪子藩子全羅道脩造戰艦九百艘

冬元遣使督修○十一月癸丑火星食

月伍允孚泣白于王曰火星食月實非常之變非飯僧事佛所能禳也願慎厥身修以消災變是日放造成役徒允孚語典法掾郎朴仁澍曰典法何多滯訟耶仁澍曰內旨如雨安得不滯

庚辰元世祖十七年春三月遣使窮河源

○元使塔納至崑嶺站崑津等縣人告曰吾邑民盡隸鷹坊子遺貧民何以供億待死而已塔納來責宰相曰東民獨非天子之赤子乎困苦至此而不之恤

朝廷馳一使問之何辭以對宰相白王
王怒欲請回回之見信於帝者來管鷹
坊趙仁規力諫公主亦言乃止○王親
試文臣取趙簡等九人賜黃牌籍內侍
辛巳
○龍化院池魚死浮出無數伍允亨言
甲戌年東池有此怪而元宗晏駕請王
修省允亨質朴每以災異切諫王憚之
○五月忻都茶丘金方慶等舟師征日
本敗績所支兵糧十二萬三千五百六
十餘石已而罷征東行省○王與公主

幸慶尚道按廉閔萱苟容自銜專擅啓
事以媚於王人謂內按廉俄賜王肯別
監朴貞杞及閔萱帶紅時人語曰如今
邑宰紆朱紱盡是生靈血染成○以昇
平府使崔碩為秘書郎昇平舊俗邑守
替還必贈以八馬惟所擇及碩還邑人
例持馬請擇碩笑曰馬能至京足矣何
擇為至家以馬歸之吏不受碩曰吾守
汝州吾有牝馬生駒今帶以來是我之
貧也汝之不受豈非知我之貧而以我

為貌辭耶并其駒授之自是其弊遂絕
刑人頌德立石號八馬碑

壬午冬十二月殺宗小保樞密使信國公文天

祥始海運

○秋王與公主敗于忠清道至十月乃
還公主渡臨津怒曰遊敗非急務何為
引我至此王無以為對次安南公主責
尹秀曰此地無鵝鵠何誘王遠來王慚
憤露坐於外將軍朴義獲一鵠來王大
悅賜衣時尹秀朴義等導王遊敗世子

年九歲忽泣下曰今茲百姓困窮又當
東作父王何為遠獵顧謂朴義曰每以
鷹犬從矣吾君者此老狗也○元遣使
來修戰艦復征日本也分遣使于沿海
四道董之元又送楮緡三千錠為修艦
費本國使謂言於王曰以蠻夷攻蠻夷
中國之勢也請令高麗蠻子征日本備
兵糧二十萬碩帝許之禿魯花金忻等
謂賙曰汝非黔弼資諒之孫耶而欲壞
國家如此賙曰汝國王如泥塑佛耳尹

秀李貞等剝民所取亦足以備軍糧我
欲去左右姦臣復正三韓也重房調東
征軍有撤屋而逃者奪其田以與從軍
者遣部夫使于諸道備兵糧又令諸王
百官工商奴隸僧徒出軍糧有差已而
帝寢東征○戊申夜有物赤如火大如
斗漸如席墮于順昌宮流星相繼而殞
既而暴風作火起宮中焚蕩無餘王召
文昌伍允孚曰嘗言當有火災何以知
其然耶對曰天譴章章此猶為小災也

癸未

甲申

○夏王及公主世子如元九月還○典
法判書金愔死時貞和院主有寵於王
認民為隸民訴於典法司有旨督令斷
與貞和愔與同僚知其寃不能違唯郎
李行儉死執不可會疾作有告愔等遂
斷為隸有人夢利刀自天下亂斫一司
之吏明日愔疽發背死同僚相繼死惟
行儉免

乙酉

○東寧府千戶崔坦來享王○以內豎

上將軍金自延為東京副使公主謂王
 曰予聞東京是王之外家然乎曰然公
 主曰家奴為邑宰可乎南班人得居中
 外重任始自何代王曰自元廟始公主
 曰王真元王之子也王有慚色王留意
 音律嘗使內豎與伶人鼓樂公主遣人
 告王曰以絲竹理國家非所聞也遂罷
 之○九月王及公主幸南京時禾稼未
 收皆為從騎蹂踐南京副使嚴守安勸
 王幸三角山文殊窟鑿山開道一方騷

甲申

文殊

然王以守安為能賜三品階

丙戌春三月遣侍御史程文海訪求江南人材

○王欲以叅官授一內官左承旨安戩
執不可王強之對曰題品銓注豈臣所
堪乞擇賢者代之言甚剴切王怒起入
內戩隨之啓曰臣罪當罷內豎叅官之
命乞須後日王已逾閭顧而厲聲曰可
左右皆懼戩退徐曰殿下許臣矣遂削
去擬牌戩典銓注每守正不阿時稱鐵
齋○夏五月王獵于西海道率相伏閣

經世書補卷八
五十九
諫不從後又農月以獵騎一千五百出
畋宰相切諫怒不從

丁亥冬十一月以桑哥為尚書右丞相

○三月監試試員林貞犯享王故事掌
試者宴賀客近年先試享王謂之品呈
遂為常例○王聞乃顏叛遣柳庇如元
請舉兵助討已而柳庇還言帝已親征
乃顏擒之罷諸路兵命王入賀王召世
子入朝金羅道王旨別監權宜以銀四
十斤虎皮二十領助世子行李費世子

曰此物皆剝民歛怨悉還其主○萬戶
韓希愈等享王酒酣王起舞自歌王屢
於宴席輒起舞公主止之不聽○賜尹
宣佐等及第國制科舉之目乙科三人
丙科七人同進士二十三人世以同進
士頭官不達人皆惡之宰相朴仁規子
禍名居同頭王嫌之間李混加丙科八
人置禍其末

戊子夏四月召宋江南招諭使知信州謝枋得
辭不至秋九月置徵理司冬十月遣文錫

考諸錢穀十一月立桑哥輔政碑

○知都僉議司事廉承益免時洪子藩
首相趙仁規亞相承益次之承益得幸
兩宮常居禁中稀至都堂一日子藩先
出仁規語承益曰國人謂洪公真宰相
謂我為老譯謂公為老呪我等不預真
宰相之目唯當勤朝衙夕直耳承益即
日辭免○禁慶尚道觀農事獻細麻布
先是觀農事祭謨多斂紅麻布獻于王
又賂左右權貴及李德孫薛仁永等為

代倍增其數布極細民甚苦之王聞之
有是命○世子以各道勸農使聚斂傷
民白王罷之以按察使兼其任時世子
年十四嘗居內僚元奕膝上奕曰人主
不宜聰察殿下聰明太過宜小寬容世
子作色曰汝輩使我癡暗持美掌上如
軟餅乎奕懼○副知密直司事林貞杞
死貞杞雖以科第進昧於文學嘗監試
不能命題為王旨別監務聚斂媚權貴
驟遷擢至是暴死○流前樞密院副使

洪文系于海島時王及公主選良家美女將獻于帝文系之女亦在選中文系賂權貴圖免不得遂剪其女髮公主聞之大怒囚文系痛加嚴刑籍其家又囚其女問剪髮之故女曰我自剪髮父實不知公主使人拽髮以鐵鞭亂捶身無完肌終不服宰樞及金方慶等詣殿門營啟卒不聽流之卒以其女賜蒙古阿

古大

己丑夏四月福建叅知政事魏天祐執宋謝枋

得至燕不屈死之

○元以遼東饑遣使來索軍糧令群臣
出米有差以船四百八十三艘運米六
萬四千碩于盖州船敗者五十餘死者
百數十人○王及公主世子如元時扈
從邀功者衆增減未定乃以史官無關
於事不許扈駕史臣不從行始此

庚寅

○王及公主世子還帝詔罷東寧府復
歸我西北諸城王拜其總管韓慎柱文
庇為大將軍玄元烈為大僕尹復置西

北路諸城守令○元叛賊乃顏餘黨哈
丹兵入東鄙至雙城陷和州登州殺人
為糧遣萬戶印侯禦之三避兵于江華
王京留守宋汾西京留守鄭仁卿皆棄
城不守於是列鎮守將望風而遁賊遂
踰鐵嶺闌入交州道攻陷揚根又攻原
州雉岳城進士元忠甲擊敗之自是挫
銳諸城亦堅守始有輕敵之心元亦遣
將軍薛闡于那蠻歹等領大軍與我軍
合擊哈丹于燕歧正在山下大敗之追

奔至公州伏屍三十餘里溺死者甚多
賊騎千餘渡江而遁復整兵來韓希愈
馳馬突入賊陣中扼出最勇士一人斬
其首揭鎗以示賊皆褫氣兩國大軍從
擊又大破之哈丹父子二千餘騎遁去
薛闡千軍令嚴肅秋毫不犯聞賊屯燕
歧併日而行二戰而破皆其力也不受
慰宴遽即班師○分遣金忻韓希愈羅
祐于竹田忠清交州等道追捕哈丹餘
賊賊五百八十人降于希愈郎將李茂

遇賊于平壤與數十人捨舟登山賊衆
環山飛矢如雨茂倚樹立謂軍士曰男
兒當死中永生毋恐開弓左射中賊將
喉應絃而倒賊中自亂茂等大呼追擊
斬獲無算○元舡運江南米十萬碩來
賑以世子嘗奏國人征役失農饑饉之
故也遂頒米于七品以下帝意本在賑
貧今不先貧富者所得居多

辛卯春正月桑哥以罷免二月罷徵理司三月

陪桑哥輔政碑

壬辰

○春正月復都開京○將軍金延壽還
自元報世子還期且以世子言白王曰
聞歲歉民飢車駕所至供億不貲願上
毋出迎境上况父不可為子屈其宮僚
應出迎者毋得過西晉道王怒曰世子
言不當如是○五月世子至自元設漿
街市施飢者三日○七月遣世子如元
賀聖節一日帝召世子入寢殿問曰讀
何書對曰讀通鑑帝曰歷代帝王誰為
賢明對曰漢之高祖唐之太宗帝又問

曰漢祖唐宗孰與寡人對曰臣年少何
足以知之○王以帝命遣監察御史金
有成為宣諭使直文翰署郭麟為書狀
官令護送日本人還其國時書狀闕人
皆計避麟忠直有文章語衆曰事不辭
難臣子之職宰相聞之遂克書狀婦翁
崔謫欲謁宰相覆奏麟奮然曰死一也
死國事不猶逾於死妻子手乎遂行日
本嘗憾東征皆拘留不還二人存沒世
不得聞

癸巳

五十二

十一

康節先生皇極經世書東史補編通載卷之八





